

ASO FARAILE, 24 IANUARI 2020

Na nofoia e le Fofoga Fetalai le Nofoa i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Fautulafono.

Ou te faatalofa atu ma momoli atu le faamalo i le lagi e mama ma le soifua manuia i leni taeao fou. Ou te muai faasilasila atu ma le faaaloalo mo le silafia e le Maota aemaise foi o le faafofoga tapuai mai a le atunuu i le tulaga na aliali mai i le Maota Fono i le aso ananafi i le ola faafuasei ai lea o faailoilo mo faalavelave tutupu faafuasei. Mo le silafia e le Maota, o le tatou Maota Fono fou leni ua maea ona faatotogaina i faailoilo mo le saogalemu lautele i so o se taimi e ono aafia ai i se mu, ma se isi faalavelave faalenatura ma lapataiga e ono aafia ai le Maota Fono i Tiafau nei. I le faamatalaga ua faailoa mai e le Pulega o Tinei Mu ma Faalavelave Tutupu Faafuasei, faatasi ai ma kamupani o lo o mataituina lea vaega, talu ai ona ua sili atu ma le 12 itula o ola pea ea malulu i aso Fono e lua ua mavae atu, o le ala lea ua aafia ai faailoilo e afua mai ai le suavai o ea malulu. Ua maea nei ona toe faaleleia ma faatulaga a tatou faailoilo e pei ona moomia mo le sologa lelei o Fonotaga a le Fono Aoaofa Fautulafono. Ia o le faaaliga lea ma le faaaloalo mo le silafia e le Maota aemaise o le faafofoga tapuai mai a Samoa.

TULAFONO TAU FAAOFI O LE FAATATAUINA O TUPE FAAOPOPO (NU.1) 2019/2020 – felafolafaiga faaauau i luga o le faitauga faalua

FOFOGA FETALAI: E tolopo Galuega a le Fono Aoaofa i le aso ananafi o lo o saunoa talifuaitau le Minisita o le Pulega o Tagata Tafafao Maimoa Mai Fafo.

Ma ou te tapa lau Afioga i le Minisita e te tulai mai e faaauau lau saunoaga ua matauina foi e le o toe tele nisi o mea e oo i ai le saunoaga a lau Afioga i le Minisita.

Afioga Hon SALA FATA PINATI (Minisita mo Tagata Tafafao Maimoa Mai Fafo): Ou te momoli atu le agaga faafetai i lau Afioga i le Fofoga Fetalai, o lea ua uma ona e siitia le tatou taulaga aua le faafofogaaga a lo tatou Alii, ma e momoli atu ai le faafetai. Ia ou te faafeiloai atu i lau Afioga, malo le soifua maua ma le lagi e mama, ia agalelei pea le Atua e foai le malosi o le tino ae a le faafoega o le Maota Fono o Samoa.

Ou te faatalofa atu foi i le Afioga i le Palemia faapea foi le Afioga i le Sui Palemia ma le vaega a le Kapeneta, Minisita Lagolago, lea itu o le malu i sui usufono mamalu o le Palemene tofia o le atunuu. Malo le soifua ma le lagi e mama i a outou Afioga. I Ofisa Sili o Pulega ua o tatou faatasi, e faapea foi ona faafeiloai atu.

I le tapuaiga a Samoa, faamalo fai ole faiva ma le tapuaiga, o le tapuaiga e manuia ai le usugafono a le Palemene o lo o sasao nei.

Lau Afioga e maea le aso ananafi ua maea foi se tautalaga e tusa ai ma le tulaga na tautalagia ai lenei Matagaluega. Ae fia faaleo le faafetai i e sa lagolago mai i le matou malaga atu e avatu le Miss Samoa i Papua New Guinea. E faailoa atu ai le agaga o le faafetai i sui o Samoa o lo o avea ma konesula i atunuu i fafo ia Dr. Fa ma le faletua ia Lydia faapea foi le sui mamalu o le tatou atunuu o lo o aumau i Papua New Guinea. O se mitamitaga tele ia te au ma le matou aumalaga i le taupati ifo o le tatou atunuu e lagolagosua ma faapena ona aumai le latou faamoemoe autasi ina ia faapena ona manuia ai le alofaiva o se tasi o alo o le atunuu. O le mea moni lava e faapito le faafetai i le Susuga ia Leiataua Brunt ma le Manaiia Event, o i latou ia sa feagai ma le vaaia o le tatou Miss Samoa, ia lena e le toe tau fai atu se tala i le agaga ootia ma le faafetai i le mimita ina ua aumai le faaiuga o le tauvaga, ua toe foi mai le manumalo ia Samoa. Pei o le agaga lea e momoli atu ai le faafetai i le tatou Miss Samoa e faapea foi e sa lagolagosua aua le taumafaiga ma le tapenaga o lea vaega.

Ona ou oo mai lea i si ou itumalo. Faafetai i la outou tapuaiga....

FOFOGA FETALAI: Malie lau Afioga i le Minisita se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga i le Fofoga Fetalai mo le avanoa. E leai na ona ou faamanatu atu sa ou laga le faaleleia o access roads i mea o nofoaga foi nei o mataaga o le vavau. Leaga o lou itumalo le isi itumalo o lo o tele ai mea ia. E tatau la ona fai i ai se fuafuaga leaga e ova i le \$400miliona le sao o tagata tafafao maimoa mai i lo tatou atinae. O lona uiga, e 25% o le GDP lea e fai ai lou sao. E tatau foi la ona faapoopo mea ia o historical sites i le faatoaga lea e fai i Atele ina ia mautinoa ai ua tele se taimi o turisi e

faaoga i totonu o le atunuu. Ma lou faaaloalo lau Afioga i le Fofoga Fetalai.

FOFOGA FETALAI: Ia, se i tulai mai le Minisita o Tagata Tafafao Maimoa Mai Fafo.

Afioga Hon SALA FATA PINATI: Ou te manatu e le i maua mai e le Afioga ia Faumuina lau tautalaga i le aso ananafi, o ia vaega pei ona saunoa le Minisita o Galuega, e taatia maia aua o le mea moni lava e leai se mea e tuua, e fai uma mea uma nei. O lea ua uma ona ou talanoa atu Faumuina i le aso, e tea mai le vaiaso lea o le a sau a o le vaiaso i ona tua e alu ai le tatou asiasiga i Savaii. Ma o vaega uma pei ona e taua o le ula lea o faigamea. O le agaga tonu lava lea na ala ai ona moomia le tatou faigamalaga lea ina ia asiasia uma vaega ia pei ona aumai e Palauli Nu.3 ia Faasisina e faapea foi lau Afioga aua le faamoemoe lea ina ia taunuu lea vaega. O le moemiti a le Pulega o Tagata Tafafao Maimoa Mai Fafo ia ausia e tatou le piliona tala mai tagata tafafao maimoa mai fafo i tausaga e lua o lumanai. E tatau ona ausia le piliona tala mai lava i tagata tafafao maimoa mai fafo. A faapea foi ae manuia mai le taumafaiga a le tatou vaalele le Samoa Airways, aua o i le auala mai lea o le tatou atunuu mai fafo, o le aumai o tatou tagata maimoa mai fafo, a ia faapea foi ona aumai la outou lagolagosua i sui usufono uma o le Maota lenei, o ai lava o lo o i ai ni sites lelei e le o silafia e le atunuu, e ao ona aumai le mataupu lea ina ia tapena i ai matou nei e faalauiloa i atunuu i fafo. O Falealili, e tele foi mataaga i Falealili, ae pau lava lea, o le tau lea e faapea mai le atunuu e totogi mai le o atu o taavale e asiasi. A sau la le turisi faapea mai, ou te manao e pue le ata, a o la e foi e alu atu le tagata mai lea nuu faapea, totogi mai le \$20 pue le ata. O le ala lea o mea, e tatau ona outou silafia ma faamuamua e tatou ona tatou tufi lea o le tatou... ia puipui le atunuu i le avatu o tala e ave i fafo, e le o lelei ona tapena Samoa mo le faafoega o tulaga tau tagata tafafao maimoa mai fafo. Ma le faaaloalo lau Afioga, o le agaga lea, ae tuu maia lou faatuatuaga ia te au, o le a alu le matou asiasiga ona faapena lea ona faatino.

FOFOGA FETALAI: Malo. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, o le mataaga lea o le Pulemelei, faatoa ou oo lava i ai i le taimi lea na tofia ai au e Tofilau e ave ma Minisita o Tagata Tafafao Maimoa Mai Fafo i le tausaga e 1991. Ou te alu atu o la e tutu mai toeaiina pe toasefulu ea, ua fau lo latou fale mai le afioaga lea o Vailoa ona o le

auala lea e oso atu i totonu o le lotoa o le fanua lea na lisi e Nelesoni, ae ua leai la se lisi o toe faia ai, ua vaomatua le faatoaga. A o lea la ua tupu ae ai se finauga i le va o le aiga o Nelesoni ma le nuu, ua mananao le nuu e toe foi atu le latou fanua ua le o toe faaogaina. Manatua la ou te alu atu, o le agaga lea e faaali e le Minisita o le taumafai lea ina ia faaleleia uma nofoaga e ono faaalu ai le taimi o tagata tafafao maimoa mai fafo iinei ina ia le tasi le aso ae toe alu ua teva, maumau le taimi na sau mamao ai ae leai ni mea mananaia e matamata ai i Samoa nei. A ia manatua ua agai atu i le afa piliona tala le seleni e maua mai tagata tafafao maimoa mai fafo, maua fua, na o le omai lava e tafafao, na o le taitasi aso e omai ai, masalo pe na o le 100miliona pe na o le 50miliona e maua ai e tatou, a o le atinae lenei o lea e manuia ai o tatou vaalele, tatou faletalimalo, tatou faleaiga, tagata uma lava o le atunuu i maketi, faatau ai ili, aua e omai loa tagata tafafao maimoa mai e vevela, ona feoai loa lea ma tapilipili o latou ili, tausami tatou faiotā, tausami a tatou esi, o mago. O mea uma lava e maua e le gata i le maketi iinei, a o maketi ia e i luma ane o aiga, faatau a latou siapo ma mea faapena. O isi foi e fia tausasami i meaai Samoa ai ai ma faleaiga Samoa. O le tasi lenei sese tele lea o lo o i ai nei i faletalimalo, e omai mai o i le mea e tele ai kale ma tele ai steak ae toe omai foi iinei toe serve i ai steak ma mea o kale. O le mea e tataua ona fai serve i ai niu, o ia, o ia e tunu, o ia e fai i so o se ituaiga faiga. O mea la o la e fia aai ai tagata tafafao maimoa mai fafo. Ae omai iinei e fia tausasami i mea ia ae omai foi toe avatu i ai kale lale e sili atu ona manuia kale i fafo ma steak ma mea eseese uma ua masani ai i atunuu i fafo.

O le faapuupuuga la o lau tala, ou te alu atu ae tapa mai se tupe e ave ai i totonu. Ona ou fai atu lea i toeaia, o au lea e alu atu e vaai mea la, a o le mea la na ou vaai, e leai se auala, e vaomaoa atu lava i i e tau i uta. Ona faatafatafa atu ai lava lea o le auala ma tau teuteu atu le mea e alu ai le auala, ou te fia oo i ai i Pulemelei. O aga na a Kapeneta, e fia oo e vaai, vaai mea ia aua a le vaai, e le iloa ma malamalama, e mafai lava ona sau le isi CEO pepelo. Ona ou alu loa lea ou vaai, faatoa ou vaai lava lea i se piramita maoae, faapea lava au na o Aikupito e maua ai. O le sao la lenei o le mea o le piramita. Toeitiiti lava tutusa ma piramita la e fau i Aikupito. E le tau o i ai tatou i Aikupito e matamata i le piramita tele lea. Na pau o le eseese, e oo atu loa i le tumutumu e laugatasi lava si tamai mea laugatasi, ae fau atu i lalo i maa e agai atu i luga. Na fai lava si umi o se taimi o ou nofonofo ai i luga i ina ma ou manatunatu i le mafuaaga na fai ai le piramita lenei, lea e mafua ai le tele o tala a nisi, o i lea na i ai se aai tele i aso anamua. Atonu o i lea na potopoto uma ai tagata uma e eena lanu ma taape atu ai i le lalolagi. Lau Afioga, o le taua ia o le mea lea, ma o le tele o le tatou atunuu e le i vaai i ai i le Pulemelei. Ou te alu atu la e i ai mea na e nonofo i luga pei ni maa tetele i luga o le tumutumu. Fai mai le tala a le isi

toeaina, faatoa iloa foi e latou ina ua sulu mai le isi tagata, e fa mea o pu ia pei ni foafoa, e fa, lea e taaitia i luga o maa ia. E matautia le mea lena, ona e faapea na aumai lea e le isi toeaina lena na oo i ai, ae oo i le vaveao tei ua tutupu ai mea i lona aiga, ae tautala mai ai, toe faafoi mea ia i uta i le mea na e aumaia ai. Na o lava i mea o sulu aulama e toe faafoi mea ia e fai le vaeluapo, mea ia e fa i luga, ae sa ou fesili la po o fea o i ai. Ia ma mea la na ua ave, na ave i le taimi o Niu Sila, la la e faapea o la e i totonu o le museum, se tasi o museum a Niu Sila foafoa ia.

Na ala ona taua atua le mea lea ona na ou foi mai loa ou faatonuaina loa le vaega lea a le Pulega o Tagata Tafafao Maimoa Mai Fafao, o e faamama le auala le la, o le auala le la e tatau ona mama ma mafai ona o atu ai tagata e o i uta e vaai. O le mataaga lea, o lena e tau ai i ina talatuu o le atunuu lenai.

Lau Afioga i le Fofoga Fetalai, na ala ona ou taua le mea lea, ona o le lauga a le sui usufono, e taua tele le mataaga lea ona o le mataaga lea o la e tusitusi i le tele o tusi i totonu o le Pasefika o lo o taua ai, pau lea o se piramita aupito sili ona tele ua vaai i ai tagata, latou nei o archaeologists i totonu o le Pasefika atoa, na pau lenai o se piramita maoae ua vaai i ai ma e taua tele mo talatuu o Samoa. O le mea ou te fiafia ai, o le mamao i uta o le mea la e i ai toe maua i Savaii, ona a fia alu i ai le tagata tafafao mai fafo, e le tasi la le aso e i ai i Samoa, ae masalo e tolu i le fa aso e alu ai i o, aua o lona uiga e sau i uta alu i tai toe sau i uta, e fia tilotilo pea i ai i mea nei. Ma o le mafuaaga foi la lena o lea e omai ai pea tagata suesue mai fafo e o e nofonofu ai i uta ma tilotilo pea i mea nei, ona o le taua o mea nei i talatuu a Samoa.

Lau Afioga i le Fofoga Fetalai, o le tulaga lena o lea e taumafai i ai le Matagaluega lenai, ona o le auala la, e faafitauli, leaga sa ou tapa ai sui usufono e toalua, le Afioga le la i le sui usufono o lo o faafesili nei ia Faumui faapea foi ma le Pule o le EPC i lena taimi, e sili ona oulua o e faafeagai ma le nuu e tau fuafua mea ia ma vevesi ia e tulai mai pea, e le o se mea lelei mo le atinae o Samoa.

Lau Afioga i le Fofoga Fetalai, ia o le tali atu lena ona e pei e foliga e faaataata a lafoga le talosaga lea ua aumai, a o lea ua saunoa atu le Minisita, e taua tele le mea lea i le tatou atinae lea e fai, ma e tatau ona mataitu pea le auala lea ina ia aua ne i toe o ifo nisi e nofonofu ai, faapea foi ma toeaina uma ia e nofonofu i luga o auala o le Malo e o atu ai tagata tafafao maimoa mai fafo ma tapa tupe a i latou e o atu, tasi ia tagata aiafu o lea e i ai nei. Ua le o e fai ni a latou faatoaga ae o ifo nofonofu i i ma ao tupe a tagata mai fafo o lo o o atu e tilotilo i mea nei, ma o le mea lea e tapa ai a outou Afioga o sui usufono o itumalo o lea e i ai mataaga nei, e tatau foi ona fai se tou sao e o e ave le talalelei, tala o le malamalama toe o e faitau le tusi lea o le Kenese. Na o le tasi lava lau mea e tatau ona fai e te

alu e fai sou maumaga, e te ola i le afu o le muaulu. Lau Afioga i le Fofoga Fetalai, ia o tusi taua na e tatau ona laga mai i a tatou lauga faapenei, faamalamalama toeaiina e o ifo faalavelave i atinae a le atunuu. Soifua ma ia manuia.

FOFOGA FETALAI: Ia, se i tulai mai le Minisita mo Tagata Tafafao Maimoa Mai Fafo.

Afioga Hon SALA FATA PINATI: Faafetai i lau Afioga i le Palemia. E moni le saunoaga i vaega nei, ma o le a le toe oo i ai se faamatalaga e pei ona aumaia e le Palemia ia vaega, a o le talosaga lava ia faapena ona usitaia ma o tatou galulue aua se lumanai o le atunuu. O i tatou lava e manuia ai o i tatou foi e malaia ai, o tatou o Taitai.

O le agaga moni lava ia, o tupe, e tatau ona faaalu tupe e sue tupe, aua e le sau fua tupe i totonu. E te faaoga le tupe e faalelei ai mea aua le mataaga ina ia faapena ona toe faatupulaia ai le tele o tupe e maua aua Samoa ma le lumanai.

Ou te fia oo i lou itumalo. Faafetai i le tapuaiga. Ou te le tau faalagia ou paia Sa Tuala aua ua e masani. O le mea moni lava ia i le tatou galuega o lo o taatitia, o lena ua tapena le faleaoga ma ua faapena foi ona afiio atu le aiga Minisita ia Loau ma Papalii aua le faaleleia o auala i le faleaoga faapena foi ma le malae taalo o lo o i ai le fuafuaga ia maea le faleaoga i lenei tausaga a ua faapea foi ona taatia le tatou malae taalo ua maea, atoa ai foi la ma le tatou galuega i le auala, o lena ua i ai le fuafuaga a le Malo e faatino ai, ae paga lea, o le auala lenei sa ou talosaga ia Manua masalo a tele se taimi e alu ai i le taimi na talosaga ai, pe \$100,000. O le taimi lenei, e \$1,800,000 le tupe e alu ai. E ala ona ou taua le vaega lea, e ao foi ia tatou o sui usufono ona tatou tuitui pea, tuitui pea le galuega, e mafai ona minimize le tupe faaalu pe a logologo mai le Malo i mea e tatau ona faaleleia o le auala. Aua o le mea moni lava, ana fai le galuega i le tupe lea na ou talosaga ai pe a ma le \$100,000, e le alu se \$1,800,000, matou auala ia i le alu atu lea i Leauvaatai e tau i Aleisa. O le auala o le Malo. Ae taatia ia leaga ua tai tausaga o faapena lava ona le oo i ai se faamoemoe i le auala ua leva ona talosaga i ai lenei sui usufono. O lea e momoli atu ai le faafetai i le tatou itumalo.

Ae faaalua foi le faafetai i itumalo ua faaopoopo mai, aua o le mea moni o lea ua sui le matou igoa, ua le Gagaemauga Nu.1, a o lea ua Sagaga Central. Ia o Sagaga Central o mea tau papalagi, ae leai se mea e mafai i ai leaga o lea ua aumai e le Ofisa o le Faiga Palota, ia faapena ona usitaia ia vaega. O se taimi ona tatou feiloai atu lea i Aleisa Sisifo ma Aleisa Sasae, o lena foi ua uma ona to atu sou matupalapala aua auala galue ma le vai lena ua uma... Ua alu atu foi le Minisita o Galuega faapena foi le Tamaitai

Pule o le Pulega o le Suavai ma folafola atu le tatou paipa, o lena ua faataatia le paipa aua le fofoga taumafa o si o tatou itumalo. Aua o le mea moni, ta te faaipopo i lea tausaga, a o le tausaga nei, o lo o i ai lava sui usufono e faapitoa ia te outou ae taatia mai o le a faapena ona ou faia le galuega e tusa ai ma lo outou finagalo.

Lau Afioga, ua maea le lauga a lenei sui usufono, ae lagolagoina e lenei itumalo le Tala Faatatau Faaopoopo o le Tupe. Soifua. Faafetai.

FOFOGA FETALAI: Malo faafetai saunoa. Ma o le a sosoo ai ma le Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Afioga Hon TUITAMA TALALELEI TUITAMA (Minisita mo Tina ma Tamaitai, Atinae o Nuu ma Afioga ma Agafesootai): Le paia sauoo i le afio o lau Afioga i le Fofoga Fetalai, faapea foi le afio o le Palemia, Sui Palemia faapea le Aiga Kapeneta, Minisita Lagolago, le mamalu i lena itu o le Maota i sui usufono mamalu o le Palemene o Samoa. E faapea foi le afifio o le paia maualuga o Ofisa Sili o Pulega o Matagaluega o lo o tautuaina le tatou Malo ma tapuaia foi faiva o lenei Maota. Le Susuga i le Failautusi aoao o le tatou Fono faapea lona auvaa, le mamalu o le aufaigaluega a le Ofisa o le Fono Aoao Faitulafono o lo o tautuaina le tatou fonotaga.

E faapea foi le mamalu o le atunuu o lo o tapuai faalogologo mai ma faafofoga mai i taualumaga o le tatou fonotaga i lenei taeao. Ia o ou paia lava o sa ma faiga Samoa ua uma ona tofi o le a taoto a o se alaoo e le oe faamatieina i sou leo pe faaitiitia foi pe a le oo i ai se tautalaga i lenei taeao.

Ae o le a sagai tonu lau o le fo ma agi faasulu le siuamouli e tali atu i mataupu sa laga e sui usufono i nei aso talu mai le amataga o le tatou fonotaga. Lau Afioga i le Fofoga Fetalai, e 32 sui usufono lea ou te faamauina sa saunoa, a o le toalua lava lea na afea aloaia lenei Matagaluega, ma le isi toalua sa fia faaleiloga lenei Matagaluega, ae ou te taumafai pea e avatu i ai sina faamalamalama ma sina faapupulaga ona e aoga foi mataupu sa laga mo le atiaaina ma le faaleleia o lenei foi Matagaluega ma lana auunaga.

A o le i oo atu la se faamatalaga i ia vaega lau Afioga i le Fofoga Fetalai, tau lava ina update le tatou Maota nei leaga o lea sa ou taua i le taimi ua fano ina ua talanoaina le feagai ai o le tatou atunuu ma le misela i le galuega o lo o faagasolo. O lea la ua faamautu mai fuainumera tusitusia ma faamaonia e ao ona faailoa atu mo le silafia e le mamalu o lenei Maota, ae ua umi foi se taimi o tatou talanoaina lea mataupu.

Lau afioga e oo mai i le taeao nei, o le fuainumera lea ua faamaumauina i le galuega o le aso mulimuli o lea faamoemoe, o le faamoemoe lea o le mop up lea ia po o le toe asia lea o i latou na misi i le faasologa o tui puipui. Ia ma omai ina ia taumafai e faasopolia uma lo tatou atunuu, ina ia malupuipuia mai le misela.

Talu mai la ia aso e 2 na tapunia ai le tatou Malo ae sagai atu i le tatou tuiga, mai i le Aso 7 e oo i le Aso 15 o Tesema na faamuta ai galuega a le Malo, e 176 i latou mai le 6 masina e oo atu i le 19 tausaga na maua e le i tuiina. Ae 1,457 i latou, mai le 20 tausaga e agai atu i luga, na maua e le galuega lea a le mop up a le Matagaluega e le i tuiina.

Ina ua toe ae mai galuega, sa toe faaauau galuega a le Matagaluega, mai le Aso 8 e oo i le Aso 22 o Ianuari, e 100 latou mai le 6 masina e oo atu i le 19 tausaga, e le i tuiina, lea na maua. Ae 598 i latou, mai le 20 tausaga e oo atu i luga. O le tuufaatasiga la o i latou, o lea e oo mai i le taimi nei, na maua e le i tuiina e 2, 331.

Lau afioga i le Fofoga Fetalai, ia o le toe faamaoniga lava lea o le tulaga lea e pei lava o upu foi ia lea e fai i le manu foi lea o le solofanua, e mafai lava ona taitai i le vai, ae a musu lava le solofanua ia e inu e le inu. E faapea foi la se taumafaiga sa taumafai atu i ai le Malo, ia o lea ua maua ia vailaau, o lea foi ua maua le auunaga, e ofo fuaina atu, ma taamilo atu ma taumafai pea, a o lo o i ai pea lava i latou e faafitauli ma faafaigata ma faatutugata i tulaga o aso faapenei, e le o vaai lautele i le malupuipuia o aso faapenei, aua e pei ona taua foi e se tasi sui usufono, ia a toatele tatou e puipuia, o le a malupuipuia ai ma latou e le mafai ona tui ona o mafuaaga taua, o mafuaaga tatau.

Ia o lea sa tatou lutia i puava, ae o lea ua tatou mapu i Fagalele, e pei lava ona molimauina i nusipepa foi o ananafi, lea ua... o le toalua lea na totoe sa taofia o lea ua tetea i tua. E foliga mai la, o lea ua tatou i ai nei i le malu. A o upu lava a le atunuu, e momoe lava ma manu, ae sau mala e atiae. O lea foi ua lagona i le aso ananafi, ia le oo mai o le tasi foi luitau mo le soifua o lo tatou atunuu, i le oo mai o le virus fou lea mai i Saina ia ma ua aafia ai nisi atunuu ma ua aumai ia lapataiga mai i faalapotopotoga o soifua maloloina o le lalolagi ia faapea foi ma isi atunuu e lapatai mai ai tatou, ina ia o tatou malupuipuia i le oo mai o le corona virus lea, lea o lo o ua aafia ai, ma e matuia foi ona ia aafiaga.

O le tulaga manaia la mo tatou, o lea ua tele ia le tatou lesona maua mai i le tatou feagai ai ma a tatou taumafaiga i le misela. Ma ou te talitonu, ia ua lava tapena le toatele o le tatou atunu uma a tatou faalapotopotoga i le tali atu i ia aafiaga i le taimi nei, aua o lea ua uma ona tatou asaina le gasu o le taeao i le oo mai o le misela. Ia e talitonu foi la ua lava tapena i tatou tatou te alo atu ai e tetea i lea faamai ina ia aua ne i toe afea lo tatou atunuu.

Ia tatou tatalo i le Atua, e fesoasoani mai, ae o le lagona i lenei taimi, ua alu lenei vaiaso o gagana lava le tatou Maota nei i le galulue faatasi, tausoa faatasi le avega. I lou la taofi, o le taimi tonu lenei, e faatino ai a tatou upu nei, o lea la ua toe faalala mai faapenei lenei luitau tele, ma e le faigofie le faamai lea, ona e le o mautinoa lelei po o a auga o le siama lea, aua toatele ua vave ona taamilo e pei lava o le taamilo foi o le misela. O le taimi la lenei, let us walk the talk. Tatou galulue faatasi, tausoa faatasi le tatou avega, ia puipuia le tatou atunuu, mai le oo mai o le faamai lea o le corona virus, lea ua faalala mai e ono aafia ai lo tatou atunuu.

Lau afioga i le Fofoga Fetalai...

Tofa Lealailepule Rimoni Aiafi (Faleata i Sisifo): Lau afioga i le Fofoga o le Fono....

FOFOGA FETALAI: Se i tulai mai le sui usufono o Faleata...

Tofa Lealailepule Rimoni Aiafi: Faafetai lava i le avanoa i lau afioga, ae e fia fesili atu lava i le afioga i le Minisita, ou te alu lava i le aso lea o le uluai aso o le tatou fonotaga o mamafa lou mafaufau i le mea lea sa saunoa i ai ia le tofa ia Olo. E faapea e leai se tatou mea lea o le Pandemic response plan.

O le mea ou te ofo ai lau afioga, o tatou ua ova plan. Ou te manatua le taimi na oo mai ai le faamai lea o le SAS (Subvalvular Aortic Stenosis), o le taimi lea ou i ai i le malaevaalele a o pule le afioga ia Eti Enosa, sa fai ai foi i le taimi lea. O le mea lea ou te fesili atu ai i le afioga i le Minisita aua o lea ua saunoa mai, ou te talitonu o lena ua i ai ia le plan pe mafai ona toe faamalamalama mai, ina ia aua ne i panic tatou, ma le faaaloalo lava, faafetai.

FOFOGA FETALAI: Ia, e e pei o le finagalo lava o Olo ia o lea ua uma ona...

Afioga Hon TUITAMA TALALELEI TUITAMA: Lau afioga e fai si paovale o le sui usufono lea. E silafia lelei lava o le matafaioi lea o lo o i ai e faasino i ai le vaega lea. O lea e i ai ia le tatou NEOC, ia o lea foi e i ai le tatou Matagaluega o le Soifua Maloloina, Disaster, o lea e i ai le tatou vaega e feagai ma tulaga faapena, o le a ou le tali atu la i lau fesili faamolemole. Ae tau i ai se taimi.

Sa ou manatu e i ai se taimi aua le mataupu lea na e laga, ae o lea la ua toe sui lou mafaufau, e sili ai le tuu pea.

Tofa Lealailepule Rimoni Aiafi: Malie lau afioga i le Fofoga o le Fono, faamalulu atu lava i lau afioga i le Minisita, leai o le uiga o lau tala, a faafofoga i ai i le aso lea na laga ai le mataupu lea, e serious i le faafofoga mai a le atunuu aua ua sui. I le faapea e leai se tatou plan, e leai. O le mea la lea...

FOFOGA FETALAI: Lau afioga i le sui usufono mamalu, o lea o le a toe lagalaga le ogasami lea sa tatou omai ai. E lagona lava le faanoanoa i le tulaga lea. O lea ua uma ona malele le afioga i le Minisita o le Soifua Maloloina, ia se i alolofa ia o tatou sui usufono, o le mea pe fia ea plan na sa lafo i lalo e pei e 18 ea pe 28. Ioe, se fai ma matau mai ia tatou galuega. Ia se i silasila la i lou tulai mai o le a toe tulai mai ia...

Tofa Olo Fiti Afoa Vaai (Salega i Sasae): O le mea lea e leaga ai le tuai mai i Fono e le malamalama ai i mea ia na tatou talanoa i ai.

FOFOGA FETALAI: Ia malo faafetai, leaga e ta te musu e fai se upu faapena, ia tulai mai le Minisita.

Afioga Hon TUITAMA TALALELEI TUITAMA: Lau afioga i le Fofoga Fetalai, ona ou agai atu lea i mataupu na laga e sui usufono. O le mataupu lava nei i Sui o Nuu, ma Sui Tamaitai o Nuu, ai o le isi lea vaega tele o lo o feagai ma le matou Matagaluega, e tutupu mai pea, tutupu mai pea, a ua manino lava ia le Tulafono.

O Sui o Nuu ma Sui o le Malo, o lo o aiaia i lalo o le Tulafono, o le lotoifale Internal Affairs Act i le fuaiupu 14, o le mataupu tau lotoifale, 1995, le tofia o Sui o le Malo, e tofi e le Kapeneta i lalo o le fautuaga a le Minisita. O le Sui o Nuu, e filifili mai lava e le nuu lava latou, fono a alii ma faipule, ia po o le fono a le nuu. Ia aumai lea o le latou sui e aumau i se auala tusitusia, e tusi mai i le Minisita, o le sui lea ua o matou tasi i ai, o le avea ma Sui o lo matou Nuu. Ia ona ui mai lea i le Faaululuga o le Matagaluega po o le CEO ma faaoo atu ai i le Minisita, ona ave lea o le submission i le Kapeneta, e talia ai.

Ae fai foi ia le suesuega a le Matagaluega i le taimi e faatoai ai ia lea nomination mai i le nuu, i le ua latou filifilia, ia po o se tasi ua agavaa ia pe sa talafeagai foi mo lea mataupu, ia po o i ai nai nisi faafitauli o feagai ma ia, ia ona faatoa oo atu ai lea o le mataupu i le Kapeneta e fai i ai lana filifiliga faaiu pe talia pe le talia.

O Sui o le Malo, o le sui lea e i totonu o le Tulafono, e filifilia lava e Minisita, ona tuu atu foi lea i le Kapeneta, e fai i ai faaiuga a le Kapeneta i sui o le Malo. O le taimi nei, o lo o matou galulue ma ekalesia, o lea o lo o i nuu ia e taua nei e le o ni nuu mavae, lea e o mai ai Sui o le Malo, ina ia

fesoasoani mai e nominate mai sui ia. Ia o le a tilotilo pea i ai le Matagaluega i se isi faiga e tuuina tau foi i le Kapeneta ia ni fautuaga, mo le tofiaina o Sui o le Malo. Ia pe e tatau ona aumai ia ni a latou tusi talosaga, ia fai lea o se panel foi lea e iloilo ai e ua agavaa, aua o latou ia o Sui o le Malo, e pule lava le Kapeneta i le tofiaina o latou, e le tofia mai totonu o afioaga ia. A o lea o lo o galulue ma afioaga e le o ni nuu mavae, e faaoga ai ia le i ai o ekalesia.

Ae e i ai foi le vala e pei e popole agai iai le Matagaluega, ina ne i alienate ai foi tagata o lea vaega e nisi foi ekalesia ona o le i ai o le sui o le latou ekalesia e avea ma Sui o le Malo. Ia e tele lava nai issues faapena, o lo o tilotilo pea i aile Matagaluega i se faiga ina ia aua ne i lamatia ai ia le accountability i tulaga faapea.

Ia o Sui Tamaitai o Nuu, ia o lo o i lalo lea o le Amendment Act o mataupu tau Tina ma Tamaitai, lea o lo o i le fuaiupu e 16a, o le ammendment lea na fai i le 2009. O lo o aiaia ai i ina le tofia o le Sui Tamaitai o Nuu. Mai i lena Tulafono, e filifili e Komiti a Tina, o le faaupuga lea o la e i totonu o le Tulafono, Komiti a Tina. A uma ona filifili e Komiti a Tina, ona tuu atu lea i le fono a alii ma faipule, latou te endorse ia ona aumai foi lea i se auala tusitusia i le Minisita, e ui mai i le Faauluuluga o Matagaluega ma le Matagaluega, faatasi ai ma le tuuina mai e le Sui o le Nuu. Ia ona ave foi lea i le Kapeneta, e faamaonia mai aipe faamautuina ai, ia le Sui Tamaitai o Nuu.

O le tulaga o le faafitauli lea o lo o tulai mai nei i Sui Tamaitai o Nuu, o le Tulafono, e filifili e Komiti a Tina. E le o i ai i lalo o le Tulafono, po o le a le ituaiga Komiti? Na o Komiti a Tina. O le confusion la lea e i ai i le taimi nei, ona o lea e i ai Komiti Tumama. O la foi e i ai ia isi ituaiga Komiti a Tina o Komiti o le Ie Samoa i totonu o nuu. O la e i ai Komiti e faatinoina togalaauaina. Ia ma isi lava mau komiti o lo o aafia ai tina.

O le agaga la o le Matagaluega lea o lo o i ai i le taimi nei, e sili pe a tasi lava le Komiti a Tina i totonu o nuu. E aloaia e le Matagaluega, i totonu o lea Komiti, e fai e latou ia le fetuunaiga, fai ia ni a latou sub committee, o ai e nafa ma le soifua maloloina, o ai e nafa ma togalaauaina, o ai e nafa ma le lalagaina o mea Samoa. E pei o ie Samoa o fala. O ai e nafa ma le environment, ia le faamamaina o le nuu, o faleui, o fale kuka, ia ma mea faapena e i lalo uma i le vaaga a le Komiti a Tina.

Ua manatu foi la le Matagaluega, ina ia fair le distribution o le tofia o Komiti a Tina, e tatau ona tilotilo i se faiga pe lesitala ai le Komiti a Tina, ma tuuina i ai se numera, e qualify ai. E taua o Komiti a Tina, ma entitle ai i lo latou tofia o le Sui Tamaitai o Tina.

Aua ua saili atu nei i nisi afioaga Komiti a Tina, e saina mai ai pe na o le toa 6, sue atu ia nisi Komiti e le atoa le toa 10 o nisi Komiti. O nisi Komiti e oo i le 40, ia se mea foi lea e fair ai for everybody, ia e tatau ona i ai se

faiga faapena, o lea la o lo o galulue ai nei le Matagaluega, ia o lo o faamoemoe foi, e aumai se fesoasoani a le Ofisa o le Loia Sili, e matou te galulue ai e define, ia pe fai se aiaiga ina ia lesitala ai ia Komiti a Tina, ia laugatasia uma ai ia Komiti a Tina i nuu uma.

Ia o le tulaga la lea i le vaega lea na auala mai ai ia fesili ia aloaia e 2, a o isi la mataupu ia na taua e aafia ai lenei Matagaluega, ia o lea e i ai le manatu e aoga mo le matou Matagaluega, ma e aoga foi i le faafofoga mai a le atunuu, o lea ou te fia piama atu i ai. Sa laga le mataupu lea o le ECE o le Early Childhood Education. Ma ua uma la ona saunoa i ai le Minisita o Aoga.

Tofa Namulauulu Leota Sami Leota (Faasaleleaga Nu.2): Lau afioga i le Fofoga Fetalai...

FOFOGA FETALAI: Ia malie lau afioga i le Minisita o Tina ma Tamaitai o lo o i ai le faauilavea. Tulai mai le sui usufono o...

Tofa Namulauulu Leota Sami Leota: Faafetai i lau afioga i le Fofoga Fetalai, e musu foi e faalavelave i le saunoaga matagofie a le afioga i le Minisita. Leaga o lou sui usufono lea sa laga atu le mataupu lea i Sui o Nu. E le o na ma se laina ia le faamoemoe o le faatuatuaina lea o le galulue faatasi o le Malo ia aemaise foi o Sui Pulenuu ma Sui Tamaitai o Nu. E pei ona i ai le faasologa lea sa faatino i le misela.

O le talosaga sa tuuina atu i lau afioga ma le Matagaluega, se i tagatagai lava aemaise foi ia... e tautala atu i o matou nuu ia o Sapapalii ma Fusi. I totonu o lo matou nuu lea o Sapapalii e 3 faiganuu, ae 2 pulenuu o lo o tuuina atu i ai. O le talosaga sa tuuina atu, pe afa a le Matagaluega, ina ia i ai lava ia le tulaga lea, o le Pulenuu ma lona Sui Tamaitai.

I totonu o lo matou nuu lea o Fusi e 4 nuu o lo o i ai. E 2 faiganuu eseese, Vaimaga ma Eevee Fusi ma Fuifatu. E 2 pulenuu na tuuina atu ai e lo tou Matagaluega ae tasi ia le Sui Tamaitai. E eseese foi la komiti ia. E pei o le tulaga lena na auala atu ai se talosaga i lau afioga ma le Matagaluega, pe se i tagai ane i ai ma ia faafaigofie ai foi ma matua effective ai foi le service e tautua i totonu o nuu. Ia malou faaaloalo lau afioga faafetai.

Susuga Mulipola Leiataua Laki (Aiga i le Tai): Lau afioga i le Fofoga Fetalai...

FOFOGA FETALAI: Ia, se i tulai mai le sui usufono o Aiga i le Tai, sa lavea i lau... aua a tatou o i mea faapea, a tatou o se i faafofoga mai le sui usufono, ia... Ia tatou o sese ia ona o le manatu

Susuga Mulipola Leiataua Laki: Ia sa taua i le lauga vaega lea i le Sui Tamaitai. Ia e i ai foi le lagona e le fia faalavelaveina le saunoaga i le Minisita.

FOFOGA FETALAI: Ia faapai mai pea lou finagalo. Leaga a faauilavea, e te faauilavea i le mea sa aafia i lau saunoaga, lau lauga.

Susuga Mulipola Leiataua Laki: Ia faafetai, pei o le ala lea lau afioga na ala ai ona faanoi atu mo se avanoa. Sa oo i ai le lauga i le tulaga o le Sui Tamaitai. Ia o lea foi sa taua i le lauga foi i le Fono talu ai, ia ona saunoa mai lea o le afioga i le Minisita e tapena atu se tusi i le tulaga i se Sui Tamaitai.

O lo matou nuu e 3 nuu mavae e i totonu, Salua, Lepui ai ma Faleu. E eseese uma ia faiganuu. Na ou alu i tai e ave ia faiga faavae a le Malo e pei ona saunoa le afioga i le Minisita, Sui o Nuu ma Sui Tamaitai. Peitai o uta, mo le silafia e ese tai ese uta.

FOFOGA FETALAI: Masalo o lea o le a e toe saunoa, se i onosai mai o le manatu o le aso nei e itiiti tatou itula faigaluega tatou te galulue ai. Ae matau atu i le mataupu a le sui usufono, e fai si umi ona e tau faapupula. E uso uma lava ia tatou afitioaga ia le polokalame la e i ai, o Tamaitai ma le Sui o Malo. Masalo e pei e faapena foi lea sui usufono e tulai mai. Ae a matau i le saunoaga a le afioga i le Minisita, o se fuafuaga o lo o faataatia ina ia tuufaatasia ai i se taimi.

Ia ona aumai loa lea i luma mo le finagalo o le Palemene pe a pasia mai e le Kapeneta. Ia o le tulaga lena, ae malie sui usufono, se i faaauau pea ia le saunoaga a le Minisita, leaga e leai se sui usufono e le fia saunoa i le mataupu lea.

Susuga Mulipola Leiataua Laki: Lau afioga i le Fofoga Fetalai e pei o se toe faamanatu ona lea sa faatonu au e le afioga i le Minisita e tapena atu se tusi. Ua maea la ona tapena le tusi ma ua tali mai foi le afioga i le Tamaitai Pule, ua teena le talosaga. Ae o lea sa faatonu au e le afioga i le Minisita e avatu le tusi, o le faanoanoaga, sa ou tusi i le afioga i le Tamaitai Pule, ae kopi ai le afioga i le Minisita. Ia ae aumai le tali a le Tamaitai Pule, e le o kopi le afioga i le Minisita o lona uiga e le i oo i le Minisita le mataupu. Ia o le ala lea o le toe faamanatu i le afioga i le Minisita, leaga o lea ua see ese ma le vaega lea o le tulaga o le Sui Tamaitai, ma le agaga faaaloalo faafetai.

FOFOGA FETALAI: Ia malo, faafetai.

Tofa Aumua Isaia Lameko (Falealili i Sisifo): Lau afioga i le Fofoga Fetalai sina avanoa e...

FOFOGA FETALAI: Ia se i saunoa mai le sui usufono o Falealili Sisifo.

Tofa Aumua Isaia Lameko: Na o se mea lava e fia maua ai sina malamalamaaga i le afioga i le Minisita. O le tulaga lea i le Sui o Tupulaga Talavou. Ia po o le a se tulaga o i ai ona o lea ua i ai le Komiti Faafaoe mo Tupulaga Talavou ma le faaaloalo tele.

FOFOGA FETALAI: Ia faaiu mai le saunoaga a le afioga i le Minisita.

Afioga Hon TUITAMA TALALELEI TUITAMA: Ia lau afioga i le Fofoga Fetalai, o lea ou te faamauina i i. E sao le sui usufono lea sa saunoa i le vaega lea o Sui Tamaitai ia faapea foi ia le sui o Falealili. O lo o ou talia pea seia oo atu le tusi, ia ona ma toe talanoa lea aua e pei ona fai atu, o lo o i ai le Tulafono, lea e mulimuli i ai le Matagaluega. E le o faia e se loto o se isi ia po o... leaga o i ina e fesasi ai ia tatou mataupu faapea, e fai lava si lavelave o tulaga ia.

Sa ou fesiligia foi o lea sa maua mai i o le fesili lea, lea ua toe laga mai, o mea o pitonuu. O pitonuu foi ia e toatele, ae mo le silafia, e le o i lalo o le tatou Tulafono ia ni pitonuu. E na o le nuu lava lea e i lalo o le Tulafono, o lo o tasi le faalupega.

E i ai foi nisi nuu na omai fai mai, e 2 matou nuu, e eseese faiganuu, ae tasi le faalupega. Ia e le mafai, o la i tai i Mulinuu, o e faamaoti mai ai, e eseese tou nuu. Ma aumai se faaiuga mai le Faamasinoga, e faamaonia ai, e eseese tou nuu e eseese foi ia tou faalupega. Ia ona talia lea e lo tatou Matagaluega. Ia e pei o le tulaga na o lea e i ai, e fai lava si lavelave o mataupu lea i tulaga ia, ae o lo o galulue e taumafai e trace

Mo le silafia, e 171 ia Sui o Nuu ma Sui o le Malo i Upolu nei, 85 Savaii, 256 Sui o Nuu ma Sui o le Malo. O le tupe faaalu a lo tatou Matagaluega o lea o lo o alu ai, e \$1, 000, 680 i le tausaga. Sui Tamaitai o Nuu, 200 ia Upolu ma Savaii e \$1, 000, 050 lea e alu ai. Ia e seu foi le galu, e seu foi le manu ae tilotilo i le galu. A gafatia i seleni a le tatou... ia o le a le mea o le a... se tofu le pitonuu ma le Sui o le Nuu. Ia maumau lava pe a na ofo mai le auunaga, e galulue fua. O e talia ma le faafetai, ia ae tau fuafua foi i seleni o lo o maua e le Matagaluega, e faasoa i ai i le tulaga lea ia laugatasia uma ai i le tulaga lea o tofiga.

Ia e le gata ai i i o lea o lo o galulue pea, e le o nofonofo foi ia le Matagaluega, o lo o tilotilo pea i ni auala e foia ai ia faafitauli ia e pei ona

laga mai, ma e o le a maua lava i se taimi ia lo tou tali e faamalieina ai outou finagalo.

Ae o le tulaga lea lau afioga lea sa ou taumafai atu ai i le ECE, ona e taua ia le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau afioga i le Fofoga Fetalai...

FOFOGA FETALAI: Malie le Minisita se i saunua mai le Taitai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Na o sina mea e faamalamalama atili ai le vaega lea, o na ua faafogafoga mai, e le gata i le Minisita le mataupu. E oo atu i le Kapeneta, ona o aafiaga la ia. O le ala foi lena e i ai le taofi o le Kapeneta, o isi foi matai tausii nuu. Po o le a lava le tele o le nuu, ae e mafai lava ona tasi ia le fofoga o le Pulenuu, o le faiga lena e maopoopo ai. Po o le a lava le tele, ae a lelei e e faia le nuu ma le Pulenuu, e tasi lava le fono e mafai ai ona maopoopo ai.

Ae amata loa ona tatou o i le tulaga foi lea o le fai lava o le Pulenuu a le pitonuu latou, o le tasi lena auala e le maopoopo ai le nuu, ma leiloa ai e le isi pitonuu mea la e fai i le isi pitonuu. O le tasi lena auala e malepelepe ai le nuu. Ua le taele i le vaitele ae ua taele i le magavai. Aua o le upu lava lea e masani ona aumai e toeaiina, e sili atu ona taua le taele i magavai. Ae o le amataga lava na sau ai ia mea faapenei, e na o le tasi lava le pulenuu.

Ae a alu loa la i mea nei e tofi le nuu ma...ona le 200 lea ma ona tupu o tofi, ae ua ova ma le afe. Ona le 2 lea miliona ia le tau, ae ova ma le 100 miliona a o lea e tau faasoaso a tatou seleni. O le mea la lena e le muta ai i o le mataupu e oo mai i le vaitele. Aua e tagofia loa tupe, o i ina e oti ai le mea atoa, ona le faia loa lea o isi auala galue ma isi mea, ae agai loa e alu uma tupe i i le totogiina o pulenuu. Ae faigofie lava pe a alu i le mea lea na saunua mai ai. O lou tautua i lou nuu le isi totogi, afai loa o lena, a'e e leai se mea e tuua ai. Leai loa ma ni...pe afai e leai se alauni e totogia, ona faigofie foi lea. O le ala foi lena o lea e tupu ai le mea lea e tupu nei, o le fautuaina o le nuu e aumai le tagata e talavou, e vae mama e mafai ona alu e savali, ma alu e vaai mea ia. Ae agai lava le nuu aumai le toeaina toetiiti a oo mai ai le valaau ua le mafai na savali. Aisea? Ona e tataua ona alu le alii sili i o, o lona uiga la, ona alu atu lava lea nofonofo ae le faatinoina tiute ia e tataua ona fai. Lau Afioga i le Fofoga Fetalai, o le isi lena faamatalaga, e pei o le mea lea na o ai le savali a le Minisita o Tina ma Tamaitai i le latou polokalame i se isi o afioaga i Savaii, ae o atu ae fai mai le afioaga e le i logo atua latou. Ae ua uma ona logo atu, e tasi lava le auala

e logo atu ai e le Malo, e auala atu i le Pulenuu o le sui o le Malo. E oo foi la i isi mea ia sa matou o ai. E oo atu ae fai mai, e le i logoina atu foi latou e le sui o le nuu. O le mea la lea, afai o le sui o le nuu e fai sina le faamaoni i ona tiute, o le mea la lea e taunuu ai le fautuaga lea e avatu. E aumai ni tagata e galulue, e naunau ia i latou o latou tiute. Lau Afioga i le Fofoga Fetalai, o le toe fesoasoai atu lena, e le gata ai i o le mataupu e oo mai i le Kapeneta, o lona uiga e fai si umi o e faatali.

FOFOGA FETALAI: O lea ua manino atoatoa auofala i le saunoaga a le Palemia, o lea ua ou manatu e faamalulu atu foi i le tutulai mai o sui usufono. E leai se mea e le oo i le Kapeneta ma aumai ai faiga faavae ma tulaga masani. Avea foi lenei avanoa, o la e faafofoga mai sui o le Malo, aua o isi mataupu a le Malo e logo atu ai alii ma faipule i afioaga, e logo i sui o le Malo. Ona nofonofo lea o sui o le Malo ae faamoemoe i le sui usufono e alu e logo. O le mea lena e faamaonia ai le saunoaga lea a le Palemia, e fili mai le...a o faafofoga tapuai mai Samoa, fili mai le sui e mafai ona tauave le galuega o le fesootaiga ma le Malo. Tapa lau Afioga i le Minisita.

Afioga Hon TUITAMA TALALELEI TUITAMA: Faafetai. Lau Afioga i le Fofoga Fetalai, ua uma ona saunoa le Minisita o Aoga i le tulaga lea i Fonotaga taua lea sa...o le mataupu lea o le ECD o le **Early Childhood Development**, o lo o aafia ai Matagaluega e 4 o le tatou Malo. E i ai le Matagaluega o Aoga, Matagaluega o Tupe, Matagaluega o Tina ma Tamaitai faapea foi ma le Matagaluega o le Soifua Maloloina. Ona o aafiaga ia e aafia uma i totonu o le mataupu taua lea o le **Early Childhood Development**. Lau Afioga i le Fofoga Fetalai, o le vaega taua lea tatou te concentrate i ai o le **Early Childhood Education**. E taua tele, lea e pei ona faamamafa e tatou sui usufono, e taua tele le aoaoina o tamaiti a o laiti, i le taimi lea a o early childhood education. A o le vaega lea e talanoa i ai le ECD, e le i oo atu i le Education. O aso muamua e afe o le olaga o tagata. **One thousand days of life from the beginning from conception.** I le taimi e afuafua ai le tamaitiiti seia oo i le lua tausaga, talu ona soifua mai le pepe, e atoa i ai le afe aso, o le olaga muamua faavae o le tamaitiiti. I totonu la o le afe aso ia, a faaletonu ai la le tausiga. O lea ua saunoa le Minisita i tulaga la ia, o le **psychologically effect**, o le milimili, faalogologo, o mea uma faapena, e aoga uma tulaga ia. E fia maua le toafilemu o le tina ma le pepe. Ae o le tulaga lea ou te fia avatu ai sina fautuaga. E i ai elemeni e manaomia e le pepe mai le amataga i le taimi lea o lona olaga, mai le afe o aso muamua o lona olaga. E i ai la elemeni ia e manaomia e tatau ona maua e le tina i le taimi lea o lona maitaga. E oo atu i le lua tausaga, ia faaauau pea ia le tausiga lea. O lea la e i ai le **iron**, o le

iodine, Vitamin A ma le Vitamin C. E tofu uma lava le vaega lea ma lona aoga, i le **build up** o le physical o le tamaititi. Aemaise lava o le neula o lona tino ma lona faiai. O le talitonuga, a uma le lua tausaga talu ona fanau mai le pepe, ae le i ausia mea ia, e ono i ai suiga...e le mafai ona toe suia...

FOFOGA FETALAI: Lau Afioga i le Minisia se i tulai mai le sui mamalu mai Falealili.

Afioga Fuimaono Teo Samuelu Teo (Falealili i Sasae): E tau le gasea le afioga i le Minisita e tau alu i le vaega lea, ona o le taua tele o lana mataupu lea e aumai, ma o se talosaga, se isi pre-sitting o muamua, pe le mafai ona faalautele ai le vaega lea. Ae ou te talitonu o lea ua tali uma fesili e pei ona avatu ai i le afioga i le Minisita. E na o le manatu e avatu, ae o le taua ia o le vaega lea e saunoa i ai le Minisita.

FOFOGA FETALAI: Malie le Minisita se i tulai mai le sui usufono mo Anoamaa.

Afioga Alaiasa Muagututia Moefaauro Malagaitutogiai Sepulona Moanano (Anoamaa i Sasae): Lau Afioga i le Fofoga Fetalai, faafetai i le saunoaga matagofie a le Minisita. E pau foi lea o sina mataupu sa aofia i lau tautalaga o le ECD, ona o le agaga lea, o lea na ona tatou talanoa, ae ua tataua ona tatou laa loa e faatino. E pei ona taua o le ECD o le 0 – 2years, ECE e 3 – 4 tausaga. Leaga a ou fua i pepe fananau lea na tatou talanoa ai i le isi taimi. E 400 pepe fananau i le masina e 4,800 i le tausaga tamaiti, lea foi o le a misi. Oo atu i le isi tausaga 4,800, o lona uiga o le tuai lava ona tatou faatino o le misi foi lea e i latou o le atinae taua lea mo le manuia o tatou fanau. E faafetai foi i le afioga i le...e sao lelei lava le mea lea e saunoa i ai. E pau lava lea... o le mea e manaia ai i lau faalogo ananafi, o le faataitaiga lea na fai e le Minisita o Tupe, sa tuu i ai lona taliga i le tina palagi lea sa....faapea foi le aao o le Minisita o Aoga. Se i fai i te i ua molia le aualii ia i nei mea. Ma le agaga faaaloalo, ae manaia tele le mataupu lea, leaga a tatou delay loa mea ia, o lona uiga e 4,800 tamaiti ia o le a misi i faamanuiaga i le agai i luma o le tatou atunuu. Ma le agaga faaaloalo.

FOFOGA FETALAI: Ou te fautuaina le afioga i le Minisita...faamolemole, se i e fesoasoani mai le Nofoa. I le matau, o lea ou te faamaumauina ua maea foi ona tali atoa fesili sa laga e sui mamalu. O lea foi sa saunoa le Minisita o le Soifua Maloloina. Ae le gata i lena, o lea foi na malele le Taitai o le Malo ma tauai atoa le tulaga lea i le

faamalamalama o le mataupu. Afai e leai nisi mea o totoe, alofa ia faapuupu mai le saunoaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E pau lava lea o si mea lea, faamolemole po o fai le mea lea sa saunoa i ai le Minisita o Aoga e le tatou falemai pe leai. Le mea lea o le avatu o toeiina e faia aoga ae faalogologo i manava o fafine toto, leaga o lea ua alu atu i le ea. O le mea ou te fefe ai, afai o fai le mea lea, o lona uiga, o taeao e tumutumu ai uta i toeiina e mananao e o atu e fai le tulaga lea, afai o fai, aua ne i...tuu loa, taofi. E pei o lau toe faaopopo atu lenei.

FOFOGA FETALAI: Tulai mai lau Afioga i le Minisita. Faaiu maia lau saunoaga.

Afioga Hon TUITAMA TALALELEI TUITAMA: Ua maea foi se i vagana le aoga lea e taua, ona o le a faagasolo le fuafuaga lea a le Matagaluega, ae o lea na paia i le saunoga, i le tulaga lea o le DDP, po o le District Development Plan, e le o manatu mamafa i ai nisi itumalo. A o le taumafaiga lea a le Matagaluega e taumafai atu nei, e ese le taua o le atinaeina o itumalo taitasi. Ona o le fuafuaga lea sa sau ai le tatou Matagaluega i futia ua sola, ae o atu le Matagaluega ma avatu polokalame i nuu, polokalame ua fuafuaina e i latou e lelei ai le itumalo, i le latou vaai ma le latou faitau. O le approach lea ua faaoga i le taimi nei, e le o toe faia faapena, ae ua o e fesili i nuu, e fai e latou a latou fuafuaga, ma aumai e latou a latou faamuamua, po o a tonu lava atinae e sili ona manaomia e latou, mo latou itumalo. Ona o faamaumauga lea e i le tatou Matagaluega, o lea la ua faasopolia le atunuu atoa. Se i vagana ai, pe toe tasi pe toe lua ni nai nuu e le i oo i ai, ae ua faasopolia Samoa atoa, itumalo uma i le taumafaiga a le itumalo, ma ua faamaumau. O lea foi la ua amata ona fesootai ma tatou paaga o lo o faatupemaia, ia le tele o atinae ia, aua e le gafatia e le paketi a le tatou Matagaluega A o lea ua aapa atu ma tuuina atu i le Ofisa e fesootai ma a tatou paaga i fafo, e aumai ai fesoasoani e mafai ai ona faatino o nisi o atinae ia. Lau Afioga i le Fofoga Fetalai, ona faaiu lea o so matou leo, e faapai atu ai ma le agaga faafetai tele i lou itumalo. Le paia i aiga faletolu ma le fuaifale. Faafetai i la outou tapuaiga, faapea foi ia le auauna a le Atua o lo o faafaletuluia i lo tatou itumalo Alofi Nu 1. E le mafai lava ona atoatoa se faiva pe a leai se tapuaiga. O le mea lea e momoli atu le faafetai i le tou faafofoga tapuai mai ma le tapuaia o lou nofoia o le Nofoa o lo tatou itumalo. Ia agaelei le Atua i le tatou folauga i lenei tausaga, maua manu aua le lumanai o lo tatou itumalo. Manuia lau

afioga i le Fofoga o le Fono faapea le mamalu o le Fonousu a Samoa. Soifua ma ia manuia.

FOFOGA FETALAI: Ona o lea ua tatou tu lalata i le tatou taimi malolo, ona i ai lea o le manatu, e lelei ona saunoa lau Afioga i le Minisita o Pisinisi ma Alamanuia ma Leipa, pe a talii mai ma toe foi mai la tatou Malologa.

Ou te faasilasila atu o le a faataatiaese Taulumaga o le Fono Aoa, se i maea la tatou Malologa.

Na faataatiaese Taulumaga a le Fono Aoa Faitulafono mo lana malologa masani i le itula e 10:27 i le taeao ma toe faaauau i le itula e 11:15 i le taeao.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoa Faitulafono. Ua i ai le manatu ua ulimasao le taligaolesua, faasiligamalosi maua ai le malosi faafouina e faaauau ai le tatou galuega maua ai se finagalo o le Fono, aua le tatou galuega o feagai ai nei.

E i ai le manatu o lo o olioli malie mai le saunoaga a le Afioga a le Minisita mo Pisinisi, Alamanuia ma Leipa. Ae se i tapa muamua se lafo mai le Taitai o le Malo. Tapa lau Afioga i le Palemia.

LAFO MO LE FAAAUAUINA O ITULA FONO

Susuga Hon TUILAEPA AUUEA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, faapea le mamalu o le Maota nei. Ou te tulai atu ma le agaga faaaloalo, ona o le Aso Faraile foi lenei, ua faatulaga e vave malolo ai Taulumaga o le tatou Fono Aoa. Ae talu ai ona e le i maea ona tali le tatou Malo. Ou faatu atu ai le lafo, *Ina ia faaauau Taulumaga o le tatou Fono i le aoauli nei, seia maea ona pasia le Tala Faaopoopo o le Tupe, ona tolopo ai lea mo le vaiaso fou, e faaauau ai a tatou Fonotaga, ona e feololo nai a tatou Tulafono, lea ua taoto i lumamea mo le tatou talanoaina ma pasia.*

O le lafo lea mo le faamaoniga a le Maota.

Faaluaina e le Sui Palemia ma le Minisita mo Pisinisi, Alamanuia ma Leipa.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2019/2020.

FOFOGA FETALAI: Ou te tapa lau Afioga i le Minisita mo Pisinisi, Alamanuia ma Leipa.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai i lau Afioga i le Fofoga Fetalai. E muamua ona ou momoli atu le faafetai i le Matagaluega o le Fono i le taligasua, ua tali ai le sua a le mamalu o le Palemene, maua ai se faasiliga malosi e faaauau ai la tatou Fonotaga.

Ae le i faia se tala a Satupaitea, e muamua pea ona faatulou ma faatalofa atu i le paia ma le mamalu o le Fonousu a Samoa i le afio o lau afioga i le Fofoga Fetalai, le afio o le Afioga i le Palemia ma le mamalu o le Kapeneta, afifio Minisita Lagolago, tuu atu i le la itu, i le afifio o Taitaifono a Komiti faa-Palemene, sui usufono mamalu o le Maota Fono a Samoa. E faatalofa atu ma faatulou atu i le paia o Ofisa Sili o Pulega o Matagaluega, o i latou ia o lo o vae ma lima i ai lo tatou Malo i le faagaioiga o le tatou Malo.

E faatalofa atu i le paia o Samoa ua mafai ona faafogafoga mai i lenei taeao mai lava i Saua seia paia Agalega, e faatalofa atu. Faafetai i lo outou tapuai mai i Fonousu a lo tatou Malo i lenei vaiaso atoa. E faatalofa atu foi i si ou itumalo, malo le tapuai.

Lau Afioga i le Fofoga Fetalai, e i ai nai sui usufono na afea le auaunaga o ou vaaia i le taimi nei. Ma o le a ou taumafai e tali atu i ai. Ua ou faalogo atu e faaauau pea la tatou Fonotaga. O matou ia mai Savaii o lea e fia o i le vaa o le 4:00, o le a faapuupuu atu lava le tali, a le faamalieina se sui usufono, ona afio atu lea i lou ofisa i le vaiaso fou, ma faamalie atili ai lea o outou finagalo.

Lau Afioga i le Fofoga Fetalai, sa i ai le sui mamalu sa lafo mai le latou manatu ma le latou fautuaga faapea foi ni manaoga i mea tau fanua o lo o vaaia e le SLC, lea ou te vaaia i le taimi nei, i le vaega lea i Tafaigata. E fautuaina le sui mamalu, o le faagoioiga o fanua, a manaomia se fanua, avatu le tusi talosaga, ao le mea lea ou te faalogo atu i le sui mamalu o Faleata ua le maua po o le 1 po o le 2, le afioga ia Faumuina, pe ni mea e nonofo ai, tai kuata eka po o ni afa eka. Ua uma ona fua le vaega o fanua ia i Tafaigata, ae ua amata foi ona tuu atu i ai ia i latou ia sa talosaga mai. Pei ona silafia e selau ma ona tupu eka o le fanua lea. E tele lava vaega ua ave i le Police Academy o le HPU, ma isi ua tele lava le vaega o le fanua ua

alu, ae o lea ua vaevae vaega o lo o totoe, atonu o le mea lea sa saunoa i ai le sui usufono. O auala lea e oso atu i autafa o le Fiafia Park, o auala a le SLC, e alu i tua i fanua ia ua faamoemoe mo aiga ia e fia relocate atu i Sogi. Ae o le fautuaga i le sui usufono, aumai pea ni tusi talosaga e tilotilo i ai le Matagaluega e maua atu ai se fesoasoani i le itu lena. E ova i le 3,000 le lisi o tagata e fia manaomia ni fanua. O le tele ia o le demand, ae ua amata ona laiti fanua o le tatou malo e mafai ona vaevae i tulaga faapea e tai eka ma kuata eka. Sa saunoa le isi sui mamalu, e limiti ia tai 50 eka po o le 100 eka ia fanua o le Malo. O le tulaga lena o lea e i ai i faatoaga, o le tele lava o fanua la e tuu atu i isi o le 100 eka. Ua gata ai i ina, ua le toe i ai foi ni fanua o le Malo.... i le taimi lenei i lalo o le SLC, e oo atu i se tai 50 eka. Ua uma ona tufa atu i tua, ma o la ua faaaoga e tagata. O le tulafono o le SLC lea ua faamalosia, o le faaaoga po o le toe sei ese mai. Aua le avatu o le fanua, nofonofu ai lava lea, totogi mai le lisi ae leai se aoga o le fanua i le Malo. O le policy o lo o i ai, **use it or lose it**. O lea lava la ua gaoioi uma le aufaifaatoaga nei, e galueaina fanua ua tuu atu ia i latou.

O le mataupu lona lua, o le tatou vaalele sa laga mai e sui usufono. E muamua momoli atu le faafetai a le Maota lenei. I la outou lagolago i le tatou vaalele, e ui lea i le tou faimalaga ai, faimalaga ai ma outou aiga. I le o i Niu Sila, Ausetalia ma toe foi mai. O le lagolago lena o lo o manaomia i taimi uma. E leai lava se auaunaga e atoatoa, e i ai lava taimi e sasi ai foi, o mea foi nei o vaalele, e alu lava le lena vaiaso o taumafai e **catch up** se malaga e delay pe cancel ina ia faamalieina uma tagata. Ae o lo o taumafai lava le tatou vaalele ia aua nei tutupu ni mea faapea. Ona o tulaga le maalofia i tulaga tau femalagaiga i luga o le ea, e ese le faigata ona faamalieina. E tatau na tu le vaalele ae siaki, o le mea lea na tupu i Ausetalia, ia ua pa le pau. Maua ae lea fasi uamea o lo o taatia i totonu o le Malaevaalele. O lea la e fai nei suesuega, pe na faafefea ona oo lena fasiuamea i lea na pa ai le pau o le tatou vaalele. O lea foi na toe delay ai, e lua itula o sui le pau. Ae i ai la domino effect, lea e aafia ai le sau a le vaalele po o taunuu mai o le agai i fafo, tulaga uma faapena. A ia lava pea le onosai i tulaga faapea pe a tulai mai. E tasi lo tatou vaalele, o le faafaigata lena, ae o lo o taumafai i le taimi nei....sa laga mai e sui usufono, e tatau ona lua a tatou vaalele, e manaomia le lua, ua leva ona ta manao i se isi vaalele. Ae paga lea, e le o ni mea e faapea e tai \$100,000 ni tau. E tatau ona tatou tilotilo i **options** uma o lo o open mai mo i tatou e mafai ai ona maua se seisi tatou vaalele. Ae o lo o galulue ai le tatou kamupani ma konesale i fafo, e suesue po o fea se mea e maua ai se tatou vaalele, e mafai ona tatou afford ina. O le mea lava lea i le lalolagi atoa e aafia ai foi ma tatou, lea e tupu i vaalele ia **Boeing**. O lea toetiit lava oomai le tatou vaalele ae taofi loa. Ua aafia uma ai lava le lalolagi e le na o tatou. Ua taofiofi uma a latou vaalele lea sa masani na o tatou o i ai lisi

mai. O lea foi ua taofi e latou ona e le iloa po o le a le tulaga e i ai le **boeing** ae o la e i ai a latou vaalele e faaoga. Ua le mafai ai ona vave maua se tatou vaalele. Ae o lo o galulue lo tatou Ofisa e taumafai e 2 pe 3ni a tatou vaalele, ae onosai mai.

Sa faaalua e se isi sui usufono pepa foi ia e i luga o le vaalele o **arrival cards**, ia faamalulu atu, ua uma ona ou...o le va lea o vaalele ma le immigration, o le immigration e faia pepa ia, ona avatu lea i o, ona o lea i le vaalele ma ave i luga o le latou vaalele. O lea ua uma ona ou talanoa i le susuga i le alii Pule, afai ua taunuu atu i o, fai se isi faiga, afai foi o le a alu le vaalele ae o la e le i avatua pepa ia, o latou e sue mai pepa e o ma ave. Aua e leai se aoga e alu ai le vaalele, ona oo atu lea i le isi itu ua leai ni pepa e ave i tagata. O tagata la ia e feoai i luga o le vaalele o lea o le a tigaina i i. E na o le tasi lava le vaalele ma isi vaalele a isi vaega ia. Ao le tatou vaalele, e le se malaevaalele faapea e 40 ni vaalele e land ai i se aso. E na o le 4 lava vaalele, e faigofie lava ona fetuunai. O le le talanoa o le isi Matagaluega i le isi Matagaluega. O lea ua uma ona ave i ai le talosaga i le susuga i le alii pule o le Immigration, se i tautuana ifo, o lea foi ua uma ona faatonu le Samoa Airways e galulue faatasi ma le Immigration. A vaai atu lava o le a alu le vaalele ae le i avatua pepa, ona outou o lava lea ae faafefea? O e fesili po o fea o i ai pepa, ma aumai e o ma outou i luga o le vaalele e tufa i tagata. Atonu e le toe tupu lona mataupu, o le a lelei le fesootaiga a tatou Matagaluega. O le mea lava lea o lea e tau fai lava ma sasi ai tatou Matagaluega, o le le galulue faatasi. E alu lava le tagata ia, a o le tulaga lea, e suffer ai le atunuu, suffer le tagata femalagaai. Faamalulu atu i lea foi lape o le auaunaga. O le sui o Faasaleleaga si ou tuafafine ia Gatoloai, sa talosaga mai i **frequent flyers**. E faasilasila atu o lea ua aumai le faasilasilaga, o le faaiuga o Mati ua tataua ona maua la tatou lava **frequent flyer card**, tatou lava ia i le Samoa Airways, a o le kuata lona lua o se taimi o Iuni, o lea e taumafai ina ia tatou join ai loa i le **Quantas Airpoint Scheme**. Ona o nei foi mea e i ai foi tau, e leai lava se mea i mea nei o vaalele e taugofie. E i ai foi ma system e tataua ona enter i ai Samoa ma totogi le latou fee, ona faatoa mafai lea ona tatou faaogaina. E te alu nei e check in i inei, ae piki up mai e systems a isi vaalele. O lea e galulue tatou te o atu lava o sao a tatou ato i le **Quantas**. Afai e malaga le Quantas i Ausetalia, alu lava le ato i i..o le tulaga lona o lea e galulue ai. E pei ona fai atu, e le o malolo ai le kamupani o lo o taumafai pea.

Ia, o si ou uso lea mai Vaimauga, o le mataupu lava lea a le sui usufono lenei, ua ou matauina lava, ina ua tulai mai i le Palemene lenei e faaali mai ia te au, o le tau o fanua, ua uma ona ave i ai le tali, ae le o malie lava le sui usufono lenei. Ua uma ona ave i ai, e le mafai ona sau mai le \$35 afe o le tau e taugofie tele, i le \$8,000 lea e manao ai. Ae o lo o tuitui mai pea le sui usufono. Si ou uso tuitui pea, aua e te give up, pau le mea ou te talosaga

atu ai, aua lava e te tuitui, tuitui e sau ma se toi ia te au. Tuitui pea e fai fai lava tuu atu se tali ta te malilie faatasi ai.

Ona ou oo mai ai lea i le mataupu sa faaaliga mai e le sui usufono o Gagaifomauga Nu 3, pau lava si au faaaliga e fia fai muamua atu, sa fai lava si faanoanoa i le saunoaga a le sui usufono mamalu, sa ou le fia tu la ou te tali i ai i le taimi lena, na tuu se i uma lelei saunoaga a sui usufono mamalu ona faatoa ou tu atu lea e faaali se manatu i le faaupuga faapea e le o faia ni galuega a le MCIL i mea ia, o le o foi i tua e monitor faleoloa ma tulaga uma faapena. E le sao lea saunoaga, ma ou te talosagaina lau Afioga i le Fofoga Fetalai e faauiese i tua na faamaumauga mo le tatou fonotaga lenei, i oo i se aso faapea e sao lava e leai ni galuega a le Matagaluega o faia. Mo le silafia e le Maota nei, o lo o faagaoioi lava asiasiga nei ma e tai faalua lava i le vaiaso ma alu asiasiga nei. Ma o lea e ia te au faamaumauga o asiasiga na fai i le kuata mulimuli o le tausaga na tea nei. E 131 faleoloa sa asiasi iinei i Upolu, o mea uma lava, o tau o oloa, o fua o oloa po o pusa po o le quality o oloa la e i ai, aua ne i i ai ni mea ua expire, o tulaga uma faapena. O i ai ni tusi lisiti po o tapa ni tusi lisiti ia i latou o avatu ai a latou oloa. E 131 Upolu, 307 Savaii. O lona uiga, o le matua alu lava i le atoa o le Ofisa lea e i Savaii, aua o le mea lena na ala ai ona toe boost tagata o le Ofisa i Savaii ia aua ne i malolo. O lea lava la e aliali mai i i, o lea foi e i ai le faleoloa o le itumalo o le sui usufono. O lea ou te vaai atu i i e 7 faleoloa lea e i i, e i ai ma latou numera. O lona uiga e mafai ona siaki atu e le Matagaluega pe moni na o atu le aualii ia fai le latou galuega. O le tulaga la e faapea e le o faia galuega a le Matagaluega, e leai o la e fai.

O le tulaga la sa...

Afioga Faaulusau Rosa Duffy Stowers (Gagaifomauga Nu.3): Lau Afioga i le Fofoga Fetalai pe maua se avanoa. O le mea e fia faasao.

FOFOGA FETALAI: E faale maua mai lau... Alo i lau saunoaga.

Afioga Faaulusau Rosa Duffy Stowers: Faafetai. Lau Afioga i le Fofoga Fetalai, ou te tulai atu e tali atu foi i le saunoaga. E faamalulu atu i lau Afioga i le Minisita faapea foi le Ofisa Sili o Pulega ma le ofisa mamalu o le Matagaluega o le MCIL pe a faapea foi ua le logo malie se faamatalaga i le taimi sa fai ai sau lauga. Ae na pau lava o lea, leaga o la e i ai mafuaaga na ala ai ona ou faaleoina. O le isi mea, e ala ona ou iloa le vaega lea, leaga e le fua tasi lava foi i se Matagaluega e tasi. Faamagalo mai au i se faamatalaga. Ae pei o le mea lea ua atagia mai, e pei ua matele Matagaluega i le faatinoina o mataupu foi nei tau poloketi ma isi tulaga faapea, a ua faatuatuanai ai auaunaga masani a le Matagaluega. Na pau le agaga sa i ai, o le faamanatu atu ma le faailoa atu, e tuitui atu le tatou

monitoring lea ina ia lelei ma effective le faiga ona o lea e matau o lo o i ai ni oloa o lo o expire o lo o faatauina i nisi o faleoloa. Ma lou faaaloalo lava faafetai.

FOFOGA FETALAI: Malo. Tulai mai le Minisita e saunoa, e sao le sui usufono sa lavea i lana saunoaga.

Afioga Hon LAUTAFI FIO SELAFI PURCELL: E sao sa lavea ai le mataupu lea. O isi mataupu ia e pei o lea ua ou tago lau atu, se i vagana la o i ai se lape o le aualii ia e o e fai mea nei, ae faafetai, taatia mai. O lea o le a toe fautuaina ma faatonuina le Matagaluega se i tilotilo po o ai faleoloa, ae manaia pe ana e tau maia po o fea se faleoloa lea e i ai mea nei, ona ou fai sao lava lea, na outou o la i le faleoloa lea? O le a la le mea ua tou le iloa ai le mea lea? Ia ona mautu ai lava lea. A o le agaga lena o le saunoaga na aumai, ae afai o lea e sao lava le agaga foi na tuuina mai ai le manatu, e talia ma le faafetai. O le a se i tilotilo i ai, ae o lo o faaauau galuega ia o le o i tua, e i ai foi le galuega o lea e fesootai ai ma le Matagaluegao le Soifua Maloloina i ni oloa foi nei e le aoga po o ni oloa e le taumafaina, o le quality of food.

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua tele le mea lea o le tuliloa o mea ia o oloa. O le mea lea ou te iloa, o le faigata ona maua le lagolago mai a o tatou tagata lea e i tua. O le agaga a maua loa ni faleoloa lipoti e faafaigofie ai ona faatino galuega a Matagaluega, aua e oo foi pe fia selau le tele o faleoloa, e le mafai ona siaki i aso uma aso uma aso uma. A o tagata ia e silafia lelei mea ia o tagata e o faatau i aso uma aso uma aso uma. A silafia la mea foi e faaletonu, e tatau la ona fesoasoani foi e lipoti mai. A oo la i le taimi e faatino ai le faamasinoga, e manaomia molimau. A fai atu la e omai e molimau, ae toe mumusu foi e omai e molimau. E ala la ona taua tele le mea lea, ona o le tausaga e 1971, sa ou failautusi ai i le Komiti lea o Tau o Oloa, sa matou o ai i tua asiasi ma ave foi mea nei o moliaga agai i faleoloa. Ia, ua oo ina faafeagai loa i totonu, ua matou manaomia ai tagata foi e o atu e molimau, ae fefefe e o atu e molimau. Lau Afioga i le Fofoga Fetalai, o le tulaga lena e taua tele, e taua tele le mea lea, e moomia, aua e oo loa i taimi o moliaga, e manaomia witnesses. Se i uma talanoaga la e musumususu ifo Olo i ai e faaoso mai. Olo ua uma au musumusuga? O le tulaga lena Olo, e faufautua atu, e i ai le taimi e fai ai au saunoaga ona aumai sao lea ae le o lou nofo ma faaoso mai fua le isi sui usufono. O lona

uiga la i le faalogologo mai a le itumalo, o lea e te faaosoa le sui usufono, e mataga.

Tofa Olo Fiti Afoa Vaai: Lau Afioga i le Fofoga Fetalai, ae a fesili sao mai i le sui usufono mamalu, e leai lava ma sau musumusu atu i ai, o le finagalo o le sui usufono mamalu, leaga e atamai tele le sui usufono mamalu lea.

Afioga Faaulusau Rosa Duffy Stowers: Lau Afioga i le Fofoga Fetalai pe maua se avanoa. Faafetai lava i lau Afioga. Lau Afioga i le Palemia, leai, e le manaomia fua e Gagaifomauga Nu.3 se musumusuga a Salega, o lea lava e i ai ou lagona ma manatu ou te talitonu i ai, e le moomia fua Salega lea. Faafetai. Ma lou faaaloalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai: Lau Afioga i le Fofoga Fetalai, e te le o malamalama ia Olo, o Olo ua leva ona i totonu o le Maota, ae faatoa e sau nei ananafi. Lau Afioga i le Fofoga Fetalai, o le ala lena, e faatupu vevesi. O le mea lena e tau loa le sui usufono lea e tasi lava le mea faatupu vevesi tele i totonu o le Palemene, ia faautagia.

FOFOGA FETALAI: Malo. E leai e anoa si fasi fuaitau lea a le Palemia aua leaga o mea e tutupu. E oo foi i le tatou Palemene, a saunoa le sui usufono i le tatou Palemene, ia aumai faamaoniga, aua o mea lava na e tupu i le tulaga o le soifuaga lea tatou te i ai, aua e ese lava le manao e lipoti mai ae a oo lava i le taimi e tapa ai e le Malo faamaoniga e molimau e tusa ai o tuuaiga, ona faapena foi lea ona tauanau gata le atunuu. Ae faapena, e leaga e agai ina tapa e le Minisita faamaoniga ona aumai lea ma mea e faamaonia ai saunoaga a le sui usufono i mea o tutupu ma tulaga e mafua ai ona saunoa.

Ou te tapa lau Afioga i le Minisita. E leai e mafua ona tuuaina e le Malo ona e pei a e saunoa ona femusuai lea o Olo. Ae malie Olo aua e te faalavelave i le sui usufono o saunoa.

Tofa Oloa Fiti Afoa Vaai: Lau Afioga i le Fofoga Fetalai, ou te faamalulu atu, e leai lava ma se tala o faia i le sui usufono mamalu. E pei o lea na ou punou i lalo e aumai lau peni lea na pau i lalo vaeatu le paia o le Maota ae ai o faapea le Palemia o ou musumusu i le sui usufono. Faafetai.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai sina avanoa lava, malie lau Afioga ou te talosaga atu....

FOFOGA FETALAI: Se i onosai mai lava le sui usufono se i saunoa atu le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: A e punou i lalo, aua ne i toe memumemu ou fofoga. A e punou i lalo punou sao ae aua e te toe memumemu leaga e fai ou mata, a o le lelei ia o lau vaai.

Susuga Hon Laauli Polataivao Leuatea: Malie lau Afioga ona o lea ua taua le sui usufono o lenei itumalo, ou te faatu atu se lafo e aveese Olo faamolemole.

Afioga Faaulusau Rosa Duffy Stowers: Lau Afioga faamolemole e toe tasi lava lau tu atu i le mataupu lea, ou te faamalie atu i le Afioga i le Palemia i lau tala lea e fai atu, faamolemole, pe na ou sau lava ananafi pe na ou sau ua leva, ou te talitonu lava au ia i mea ia ou te lagona e au lea na ou faaleoina. E leai ma se finagalo o Salega na aumaia. Na pau lava le mea na punou ai Salega, o la e fia faalogologo i lou manava e pei ona taua e le Afioga i le Minisita. Faafetai.

FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea la lea na galo ia te au, ae o le a toe faauiese au upu, ae ua galo ia te au, o le amio lava lea a Olo e fai.

Tofa Olo Fiti Afoa Vaai: Lau Afioga i le Fofoga Fetalai, e faamalulu atu foi, leaga e leai se tamaloa o faalogologo i le manava o...

FOFOGA FETALAI: Malo. Se e lelei foi e vavae ai foe. Na pau lava le faanoanoaga o le Nofoa, o le a faatu mai e le isi sui usufono mo Gagaifomauga le lafo e aveese Olo ma o, ae pito leaga la pe a sosoo nei sui usufono la e toalua. Lelei. Se i toe tapa, se i fai foi sina koma a le Minisita o lo o saunoa ae tulai mai e faaauau le saunoaga.

Afioga Hon LAUTAFI FIO SELAFI PURCELL: Faafetai. Ua galo ia te au po o fea ea le mea lea sa ou... Ona avatu lea o lau fautuaga i le sui usufono mo Gagaifomauga Nu.3, a toe tagotago atu Olo i lou manava fai i ai e avatu le faatagaga i le Minisita mo Aoga, o ia e potu e fai mea na. E tagotago ma iloa le mea e tago i ai ne i te i ua sese le mea e tago i ai Olo.

Lau Afioga i le Fofoga Fetalai, atonu o lea ua faamalamalama atu e le Afioga i le Palemia le faigata o mea nei, e a le Matagaluega e o atu i tua, ae manaomia a le molimau mai o tagata. O le mea foi lena ua fai ai le tatou Ofisa i Savaii, ia o ae i ai tagata i le auaunaga, po o le a le auaunaga. Afai o i ai se auaunaga ua faaletonu, o i ina e faatoai ifo i ai, e le tau omai i Apia nei. Afai o i inei i Upolu, o lo o i ai le tatou Ofisa e faatoai i ai a latou... e lelei ai le auaunaga. E le o ni faitioga, ae faaleleia atili ai le auaunaga uma lava a le tatou Malo. E le na o le MCIL lea e fai atu ai. E masani foi ona matou o i tua ma lau Matagaluega lenei, soo Savaii, fai aoaoga i au faioloa i auaunaga o lo o mafai ona maua ai fesoasoani mo i latou ma mea e faaleleia atili ai latou pisinisi. E pei o le sefe o le tupe, aua ne i maua mai le tupe ma faaalu, ona oo ifo lea ua leai se tupe e faaauau ai le pisinisi, sustainability of the business. O mea lava nei o lea e o i ai Matagaluega i tua, ua ou alu ai foi au ma le Afioga i le Minisita Lagolago, ia faamalamalama i tagata, ia latou iloa mea e mafai ona fesoasoani atu ai le Matagaluega, o lo o i ai le tatou vaega foi lea o le SBEC e mafai ona faaofi i ai, e maua ai le malamalamaaga i le faiga o pisinisi, aemaise lava pisinisi laiti. O la e avanoa mea na, o lea e avanoa i tatou tagata. O le tagata lava ia ma le faleoloa e i ai lona naunautaiga, initiative, o i latou na e faaaogaina le auaunaga lea. E le mafai ona o atu le Matagaluega e fosi mai, fai mai le tala, can you lead a horse to water, but can never make it drink. E faapena. O le tagata lava ia e sogasoga, o lo o avanoa le Matagaluega mo se auaunaga.

O le isi mataupu lea sa faaali mai e le sui usufono mo Vaimauga o le Tulafono lenei o le Competition Act, o le auga lava o le Tulafono ia, ia faataugofie oloa. O ai la e penefiti ai? E penefiti ai lava le tagata faatau. E leai se isi e tuu i luga sa tau pe a iloa o lea ua i lalo i i le competition, le tau a le isi faleoloa lea. O le taumafaiga la lena o le Tulafono lena, a o lea foi la ua i ai faafitauli ua tulai mai, o lea foi la ua toe silasila le Malo i le Tulafono foi lea o le Price Control, atonu e toe iloilo ona toe teuteu lea o le Tulafono pe toe faaaoga le Price Control Board. O lea foi e address atu isi issues ae tulai mai foi isi issues ina ua leai se Price Control. Ia o la e tilotilo uma i ai e le faigofie, ae ua malamalama foi le Malo i tulaga faapea, ae o lea foi ua faalogologo mai le Matagaluega o lea ua tuu atu i ai le faatonuga se i tilotilo po a le tulaga e mafai ai ona address issue ia e tulai mai i Tulafono nei.

O le mataupu foi lea faapea ua ave uma e Saina ia manuia, o le mataupu foi lenei sa ou tautala muamua ai foi, ua le competitive tatou faleoloa. Atonu o lea tatou te iloa i le taimi nei, ua aggressive tele faleoloa o i latou nei o Saina, e pei lava o i latou nei o lea e tau faasea foi i ai le atunuu, ae tatou te silasila i le maualuga o le tulaga lea ua i ai oloa e maua, so o se taimi e te alu atu ai o la e matala le faleoloa o le Saina o la e maua ai mea e

te manao i ai. O tatou tagata foi po o tagata mai tua ma Savaii, ua le toe alu atu i le mea foi lenei sa alu atu faatau mai le suka 5sene, faatau mai le falaoamata lea sa service e tatou faleoloa, e leai ua lift foi i luga le latou expectation o le service e tatau ona provide e faleoloa laiti. Ia o lea ua faatumu e nai o tatou uso ia mai fafo. O le galuega foi lea a le Malo o le taumafai e lau mai investment i totonu o Samoa, o lea foi tatou te tilotilo i ai. Ua tele le suiga o le availability of goods ma le ituaiga goods ua maua mai. O lo o i ai lava le Matagaluega o le Soifua Maloloina ma le Inland Revenue ua fai ma o e asiiasi i mea o oloa ia faapea e le aoga i se taumafa i lalo la o le Food Act e administer e le Matagaluega o le Soifua Maloloina, a o matou uma e galulue i tulaga ia, a o atu e tau i ai ona aumai lea e fai se fuafuaga i ai. E pei ona saunua atu le Palemia e manaomia le omai o tagata ma se apa eleni ua leva ona... a o la e faatau mai le faleoloa. O le isi foi mea, aua le faataua na oloa pe a outou o atu e vaai atu o oloa e le talafeagai. Aua le faatauina. A faatau ona aumai loa lea e fai ma molimau i se moliaga e fai mo ia foi aufaioloa.

O le fesoasoani i o tatou tagata, e tele lava auala e fesoasoani ai i o tatou tagata e pei ona ou fai atu. O le tagata lava ia e sogasoga o lea lava e alualu i luga a latou pisinisi. E leai foi se manatu o le Malo e faapea e faailoga lanu e aua le tuua avanoa ia, i nai ia foi au faioloa mai Saina. O lo o i ai foi le tatou lisi lenei o le Reserve List, o i ina e tuu lava mo tatou tagata. A o lea foi ua tele tatou tagata mai Saina o lea ua sitiseni Samoa ua faamatuu atu foi la i ai na tulaga. Ia, a o le service foi latou te provide ina mai, e matautia. So o se taimi lava ta te alu atu ai i le faleoloa o le Saina o la e maua ai le falaoa, la e maua ai le pai. O mea uma ia, e so o se taimi, so o se oloa foi. Ae leai se manatu faapea e faapito i Saina, e leai. O lo o tutusa uma lava faleoloa o lo o i ai aiaiga o le Tulafono.

Sa fesiligia foi e le sui usufono mamalu tatou RSE scheme. O le RSE e pei lava foi o le mea lea e talanoa atu ai, e leai se faasologa foi lea faapea e tele le isi nuu ae laitiiti le isi nuu. O le manaoga o le scheme lenei, ia tutusa uma tagata ona maua ni o latou avanoa. E faapefea la ona maua? O le nuu e tatau ona omai e resitala o latou tagata, lea e fai e isi nuu. Ua well established foi isi nuu ma latou process ina ia mautinoa ua sauni o latou tagata aua galuega ia, ae tatau ona resitala e le o atu le Matagaluega i tua e tauanau mai. O lea foi e faasalalau lava pe a o atu matou workshops ia e fai i tua e i ai foi le vaega e faamalamalamaina auala o le RSE, po o Ausetalia foi. O lea la ua toe maua mai nisi avanoa mai Ausetalia e faapena foi Niu Sila o lea ua toe tuu i luga le numera o lea ua toatele lava o tatou tagata, ae manaomia pea, e manaomia pea nisi avanoa e tatala mai ona o le toatele o tagata ua ova i le 4,000 le lisi lea e i ai. O la e faasoaso ina ia tofusia i latou ua resitala ma talosaga mai. O lo i ai lava le nanauga o le scheme, **share the love**. Tusa o le motto lena share the love. O lea lava matou te

tuitui, the people need to come in to register their interest to be **under the scheme**. E tatau lava i tagata ona faailoa mai ae le o i ai se manatu foi lea faapea e faapitoau i se pitonuu po o se alaalfaga. Ia o le tali atu lena i le mataupu lena.

Sa faalogo atu i nisi o sui usufono mamalu pei sa atugalu lava ina ia faataunuu se fale o leoleo i Salelologa, ona o lea e i lalo o au le taumafaiga o le tatou taulaga lea. O la e ua i ai le fanua o leoleo latalata i le mea lea e tau faatu ai nei le tatou Ofisa o Faamasinoga. Ae o le a taatia atu i le Matagaluega o Leoleo po o le a se taimi e faataunuu ai se latou fuafuaga po o o foi i Salelologa, e tuu uma lava i ina auaunaga a le Malo, atonu o i ina e vave ai ona develop le tatou taulaga lea. E i ai foi isi Matagaluega pei o le Matagaluega o Fale, Matagaluega o Taaloga, o la e ua i ai o latou fanua o la e ua fuafua e fai ai fale, ona central uma lea o services a le tatou Malo i Salelologa ma atiae ai le tatou taulaga ua fai foi si leva o faataatitia ia fuafuaga ae o lo o galulue ai le Malo i se auala e mafai ai ona faavave.

Toe tasi lava si mea lea ou te manatu... o lea o lo o i ai le fuafuaga e aumai se tatou vaalele lapoa o le ATR e 90 le pasese ae aveese atu tatou tamai vaalele ia e lua ua fai foi si tuai. Ia, o le fuafuaga lena mo le agai i luma, ia mafai ona felelei atu i le region, o Tonga, Fiti, Toelau, ma nuu faapena. A o le fuafuaga lena o lea e alu uma i le taimi e tasi, ae manaomia lava la outou lagolagosua mai, o lea foi ua tele le aafiaga i le taimi o le misela i le feoi mai o tatou tagata. O le tupe e faagaioi ai le vaalele e maua mai le pasese o tagata. A leai nisi i luga o le vaalele, e leai se tupe. O le faamalamalama sa lava lena, bums on seats, thats simple as I can put it. O le mea lea e manaomia ai lo outou onosai. A o a foi ni mea o tau faaletonu i le tatou service, se e faigofie lava ona sau loa vili atu, se i fai ifo lava i le aualii ia ou te sau e leai se a, fai ifo i le aualii ia e faatope ifo le mea ae aua le faatali se i sau i i, ia e tasi le masina faatoa fai le Fono, ae ia iloa loa lava le mea logo mai loa, e faigofie lava lea ona address loa i le taimi lena, aua ne i toe tupu...

FOFOGAFETALAI: Se i tulai mai le sui usufono mo Faleata Sisifo.

Tofa Lealailepule Rimoni Aiafi Lau Afioga i le Fofoga Fetalai, e tasi lava le vaega taua lea sa ou laga lea ua saunoa i ai leAfioga i le Minisita. O lea e faamamafa lona finagalo i Ofisa foi nei o le Malo e tatau ona fai i Savaii o le mea e tatau ona fai. A o le mea lea sa ou talanoa atu ai, o le malae vaalele ia i Savaii, i flights. E tatau lava ona tagatagai lau Afioga po o le a se faiga e mafai ai ona fai malaga ia i Savaii e faatasi pe lua i le aso, faipaaga ai ma isi kamupani vaalele. E aoga tele lau Afioga.

FOFOGA FETALAI: Ia, se i saunoa mai le Minisita po o i ai se fuafuaga aua...

Afioga Hon LAUTAFI FIO SELAFI PURCELL: E le i fai mai sao ia te au le alii lea sa fai agai ia Papaliitele, ae o lea o le a ou tali atu i ai. E manaomia foi ae o la e tilotilo, ae e tatau lava ona iloa e ola lena mea, pe tumu le vaalele i le alu tumu le vaalele i le sau. Aua na fai muamua foi, a o lea e tilotilo i ai le Malo i le alu mamao. A aumai nei le tatou vaa lapoa lea, e le ofi o i le malae vaalele le la, e tatau foi ona fai nisi fuafuaga, a o le mea lelei. A omai foi tagata mai Savaii, ua fia omai uma i vaalele, a o tagata tafafao maimoa mai fafo, e fia omai lava latou i le vaaalalo aua e manaia le tietie, a o mea o lea ua i totonu foi o fuafuaga alualumamao.

Ne i misi ia te au si ou uso mai Faasaleleaga le fetalaiga ia Namulauulu lea sa laga mai le tatou auala i Fiaga. O lea ua uma ona talanoa atu i le Pule o le SLC, se i tilotilo i ai i le tou auala ma tautuana ia alu atu sau asiasiga i se aso a o la e fai tatou maumaga, i te i ua fai le auala ae mananao e o e tafafao ai. Ia, ae o le a tuu atu pea i lau Afioga, a o lea ua uma ona logo... se i silasila po o le a se... ona o le leaga o le mea e aega le sau i lalo e vave lava ona aafia i le vai. Seiloga la e matua fai lelei ni alavai i itu uma e lua ona faatoa iloa lea ua umi ona lelei auala ia. Ae taatia mai o lea ua faalogo atu i ai le Matagaluega.

Tofa Namulauulu Leota Sami Leota: Faafetai i lau Afioga. Sa ou faapea se i ou savalivali atu i lou ofisa pei ona e tatalo mai ai, aua o uta i Fiaga pe a ma le 30 commercial farms la e i ai. O lea foi sa amia e le Afioga i le Minisita mo Faatoaga le vaega lea e faamalosia le totoina o le talo. O le taimi lenei e ova atu ma le fa masina o tumau lava le talo i le \$70 i le 20 kilo e faamalosia ai le ave o le tautalo, ae faafetai o lea ua maua atu o lea o le a fesoasoani mai, aua o lea sa fesoasoani atu le Samoa Land i le faiga o le auala lea, ona alu atu lea afa e le i tau i uta i le... O le isi foi mea sa musumusu i le Afioga i le Minisita o Falepuipui, o le tasi lea auala puupuu lea e tau atu i le falepuipui pe a tusa ai ma fuafuaga a le tatou Malo. Ma lou faaaloalo lava. Faafetai.

FOFOGA FETALAI: Malo faafetai.

Afioga Hon LAUTAFI FIO SELAFI PURCELL: Ia, atonu o lea ua malamalama lea mataupu. E lelei foi le faapuupuu tele o le auala e oso mai ai aua e....

Afioga Afoa Amituanai Faleulu Mauli (Palauli Sisifo): Lau Afioga i le Fofoga Fetalai...

FOFOGA FTALAI: Malie le sui usufono ne i aafia i le tulaga o le saunoaga le mea lea tau...

Afioga Afoa Amituanai Faleulu Maui: Lau Afioga i le Fofoga Fetalai, e i ai le mataupu sa ou taua i lau lauga ananafi e patino tonu i le Minisita e fia fai atu sina mea e fia faasao ma faamalamalama faamolemole.

Ou te fia faasao atu le mataupu e uiga i le TV bingo lea sa ou talanoa atu ai, e leai se agaga o le sui usufono lenei e taofia mea na. O le mea lena e fia faamalamalama atu ai, ua faauilavea le sui usufono i lau lauga ae ou te le i fai atu e taofi uma bingo, e leai. O lou matua fiala lava i bingos la e fai aemaise bingo a tagata matutua. E tou te silafia foi o bingos la e fai nei i tua, talu ona pasia le Tulafono e fai i mea o fale ua saunia lelei i fale taalo ma mea faapena. E peiseai la ua atili manaia le faatinoga o bingo na, ma e lagolagoina e le sui usufono taaloga bingo mo olomatutua, o toeaina ma olomatutua ma mea faapena, ae le faapea ua ou fai atu e tapuni bingo. O lea foi ou te talosaga atu ai i lau Afioga i le Palemia, e le faaogaina lau seleulu pe a faapea e leai se tulaga faapena.

E pau lava le mataupu lea sa ou taua ananafi, ia puipuimalu a tatou fanau mai le aafiaga o taaloga ia tuusao. E peiseai o le tulaga lena o lea ou te fia faamalamalama atu ai le mataupu lea.

FOFOGA FETALAI: Malo. O lea ua maua atu faafetai. O lea ua maua atu le saunoaga a le Minisita ae lafo mai lou finagalo. Alaala mai i lalo le sui usufono se i faaauau le saunoaga a le Minisita.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai, faafetai atu i le sui usufon. O lea la o le a ou fai atu, taatia mai lau mataupu o lea ua faalogologo atu i ai i ou atugaluga, ia o le a se i toe tilotilo pe i ai se auala e fai ai i totonu o se hall mea nei o TV bingo ia aua ai ne i... E pei lava ona ou fai atu, o fanau lava a tagata ia, o latou e i totonu o latou fale, e vaai e latou. Ia o le ta o le 10 lea ua tuu i ai, ae o la e lava... afai lava o ala le tamaitiiti i le taimi lena i lalo ifo o le 21, ia, ua tatau ona tuli e alu e moe. Ae taatia maia lou finagalo, leaga o lea ou te faalogologo atu o lo o e naunau pea e... E leai se isi tali e toe avatua.

Afioga Afoa Amituanai Faleulu Maui: Lau Afioga i le Fofoga Fetalai...

FOFOGA FETALAI: E faamalulu atu i le sui usufono. E lelei ona e alaala mai i lalo ma e faalogo mai i lau...

Afioga Afoa Amituanai Faleulu Mauli: O le mea e fia faasao i lau Afioga... O lea ua uma ona pasia le tatou Tulafono lau Afioga i le Fofoga Fetalai...

FOFOGA FETALAI: Ou te faamalulu atu e lelei ona e alaala i lalo. Malie le sui usufono e lelei ona e alalaa i lalo ua maea e le toe fai i ai se saunoaga ma se lauga i lea taimi se i faagasolo le tatou galuega. Ou te faamalulu atu ai i lau Afioga i le sui usufono mo Palauli Sisifo. Ae...

Afioga Afoa Amituanai Faleulu Mauli: Lau Afioga i le Fofoga Fetalai, e taua tele le mataupu lea ou te fia faapoopo atu ai i le tatou mataupu lea lau Afioga.

FOFOGA FETALAI: Se malie ia le sui usufono ua ou faamolemole atu...

Afioga Afoa Amituanai Faleulu Mauli: Ona lau Afioga sa ou i ai i totonu o le Komiti lea na lauiluina le Tulafono ma pasia ai e le toe talia ni taaloga faitupe i luga o TV ma mea faapena. Sa i ai foi ma le Attorney General ma le pulega sa latou assure mai i le Komiti lea sa lauiluina le mataupu lea e le toe faaalua mea ia, o lea la na pasia ai le Tulafono, a o lea ua te i ua toe faasau, ia e pei la sa i ai le atugaluga o le matou Komiti, ua solitulafono le Pulega, i le faatinoga o le mea lea. E le o tutusa ai ma le Tulafono...

FOFOGA FETALAI: Ia malie le sui usufono, ua ou faamalie atu i le sui usufono mamalu, ia toe lava o le tuli o oe i fafo le mea lea e totoe. Ioe, vaai, o le tatou galuega e fai i le feavatai, o lea foi ua uma ona saunoa le Malo, ua pasia le Tulafono.

Ia ona tatou o lea i le tulaga o lo o i ai, tatou o i lena. Ae le i... o se isi foi taimi toe teuteu, ae o lea ua fai mai le Palemia ma le Minisita, ia lafo mai, toe lafo mai. Se i toe silasila i ai, taoto ai faapea, ae le faapea o le a tumalo lava lou finagalo, leaga e i ai a tatou Tulafono o lea e leo ai lo tatou Maota, a faafaigata ia le sui usufono mamalu, ia ona tapa loa lea o le Satini o le Maota e faamalolo i fafo o le tatou Fale Fono ia le sui usufono o lo o faapena ona vaogata.

O le mea la lea, ua ou faamalulu atu ma ou faamalie atu i le sui usufono mamalu. Ae tapa lau afioga i le Minisita e faaiu mai lo oulua finagalo e pei ona maua atu.

Afioga Hon LAUTAFI FIO SELAFI PURCELL: Ia faafetai i lau afioga i le Fofoga Fetalai, malo le onosai. Ae ua maea mataupu sa tuuina mai ia te au.

Se i ou pai tasi atu lava i lou itumalo faamolemole lau afioga. Ia si ou itumalo o Satupaitea, ia le Susu o Asiata le Vaiti ma le Vaimalae, o oe o le tausī vaatele, ia Susu ia le Aiga Samoeleoi, Afifio o Tapaau, alalatai le mamalu ia te oe Le alataua, Afifio foi Alo o Lilomaiava, ia faletua ma tausī, saoa ma le malosī o lo tatou itumalo.

Faamalo i lo outou tapuai i lena tausaga ua mavae, ia manaomia foi lo outou lagolago i lena tausaga. O lo o maua lava le lototele o lo outou sui usufono, e fai galuega sa outou tofia ai au i le Maota nei, ave se sao o Satupaitea, i upufai o lo tatou Malo. Ia i mamalu o auauna a le Atua, faamalo i lo outou taputapuai, ia aua se manuia o lo tatou itumalo i le itu faaleagaga.

O nai tina matutua ma tama matutua o le itumalo, ia faapea si ou tina o Anasoa, ia faamalo lau tapuai, ao ou alu ai e fai galuega na tofia ai au e lo tatou itumalo. Ia ma lou faaaloalo lau afioga, manuia pea lau afioga i le Fofoga Fetalai, maua lou soifua laulelei, e tauave ai galuega o le tatou fonotaga. Ia ma le faaaloalo soifua.

FOFOGA FETALAI: Malo, faafetai. Ia, ua tatou toai taunuu i le taimi e saunoa ma faamalamalama ai le afioga i le Sui Palemia i nisi o mea sa laga ai e sui usufono mamalu o le Maota. Tapa ma le faaaloalo lau afioga i le Sui Palemia.

Afioga Hon FIAME NAOMI MATAAFA (Sui Palemia): E tulai atu ma le faaaloalo, faapai atu ma faatalofa atu i lau afioga i le Fofoga Fetalai, le paia o le Palemene o Samoa, ia faapea foi ia Faauluuluga ma Sui o Matagaluega, o lo o lagolago mai i le galuega a le Fono Faitulafono. Faatalofa atu foi i le tapuaiga faafogafoga a Samoa ma ona tulaga faalupe, ia malo le soifua ma le lagi e mama.

Lau afioga ma le mamalu o le Palemene, na saunoa ia le Taitai o le Malo e le o se Tala o le Tupe tele naua ia le Tala o le Tupe Faaopoopo. Ia pe \$23.5miliona lea ua tuu mai e fai i ai lo outou finagalo. O fuafuaga a le Malo e pei ona faataatia i le Tala Autu. Ma e ou te manatu ana leai ia le faalavelave o le misela, masalo o le tatou Tala o le Tupe pe a ma le \$18miliona ia le tupe e tatou te faasoaina.

Ae lau afioga i le Fofoga Fetalai, matauina i le usua o le Fono, o lana fonotaga muamua o lena tausaga, ia ua saausi lava ia saunoaga ma fetalaiiga foi o sui usufono uma o le Maota. Ia ma o lea ua faagasolo ia le tali fuaitau a le Malo. Ou nofo lava ma mafaufau lau afioga i le Fofoga Fetalai, o lea tatou te tuliloa ia le tatou galuega, ia a fua lava i le tulaga e leai se tupe o tuu mai i au Matagaluega, ou te leiloa po o le a le mea o le a ou vevesi ai fua au ou te talanoa atu ma... e leai se tupe o aumai ia te au.

Ia, ae ui i lea, o lea e maua o lo o faaali pea ia finagalo o sui usufono mamalu o le Maota, ia e pei o le a le faaaloalo foi pe a le tali fuaitau i mataupu. Ia ma e atonu o le agaga lea e toe foi lava i le faamatalaga autu o le tatou Tala o le Tupe o lo o faasolo nei.

Ae faalogologo atu ma faamauina ia finagalo o sui usufono o faaalia, ia e pei e 3 nai vaega, o vaega lava ia o le tali atu i le suiga o le tau, ma aafiaga o... aemaise le moomia o tatou taligalu. E pei o le vaega tele lea. Ia o le isi vaega sa fesiligia, o tatou poloketi lea i le Vaimauga po o le Vaisigano. Ia ma se mataupu o le lisiina lea o fanua o le Malo mo nisi o manaoga e pei o faleaoga.

Pe e lelei la lau afioga i le Fofoga Fetalai, se i toe fai atu ia sau ootoga puupuu. E faavae i luga o le faamatalaga na avatu i le felafolafoaiga i luga o le Tala Autu o le Tupe, i le mataupu lava lea o tatou taligalu. O le mea muamua ua maea ona taatia fuafuaga a itumalo taitasi po o a tatou peleni, **CIM Plans** o lo o faapena ona faataitia ai manaoga o itumalo taitasi. Ma e o na fuafuaga, o lo o faapena ona fuafua i ai ia galuega faatino a le Malo mai lea taimi i lea taimi, aua o lea lava tatou te mautinoa, ia saunoa foi le Taitai o le Malo i le afioga i le Minisita o Tupe, e le mafai ona tatou faia uma mea uma i le taimi e tasi. E faasoaso lava ia le tatou tamaoaiga o lo o maua mai i lea taimi i lea taimi.

O le tali atu la i le suiga o le tau, e pei e 2 lava vaega o lo o autu i ai ia tatou galuega fai. O le gagana Faaperetania o upu ia e 2 o le **mitigation** ma le **adaptation**. O le mitigation o ni gaoiga e faaititia ai le afaina o le tatou siosiomaga e le kasa leaga o lea o lo o faatupu ai le vevela o le lalolagi ia ua usi ai ia pole, ma ua siisii ai ia le tai.

O tatou gaoiga, o le gaoiga pito tele o lo o nafa ma le Malo o le tatou see ese lea mai malosiaga o lo o faalagolago i luga o suauu, a ua tatou see atu i malosiaga faafouina. O lea o lo o i ai ia le faamoemoe o le tatou Malo, tatou aulia atu ia le 2025, ua 100% ia le faatinoina o vaega tau eletise i lalo o malosiaga faafouina. Ia o lo o i ai ma nai isi gaoiga e pei o le totona o tatou laau, mitia kasa leaga ia o lo o faapena ona afaina ai ia lo tatou siosiomaga.

O le mea moni lava lau afioga i le Fofoga Fetalai, o tatou ma isi foi motu o le itulagi o le Pasefika, o le mea lea e feagai ma tatou, i upu ia e 2 **mitigation** ma le **adaptation**. Aua e tele atu ia lo tatou afaina ona o gaoiga ma faiga a isi atunuu tetele, lea e afaina ai ia lo tatou siosiomaga, po o a foi ia tatou taumafaiga e fai, e faaititia ai mea ia, ia e leai ia se impact tele. Ae o le impact lea e afaina ai tatou, ia o lea lava ua tatou iloa ma outou saunoa mai ai, lea e manaomia ai ia tatou taligalu ia, ona o le siisii o le tai.

O lona uiga, o Samoa ma isi atunuu o le itulagi lenei, o le mea lava lea e tatou te taumafai e unai, o le adaptation. Ia tatou tali atu ai i suiga o le tau,

e puipuia ma faamalosia i a tatou galuega e puipui mai ai ia lo tatou atunuu. E faapuupuu atu ai se faamatalaga lau afioga i le Fofoga Fetalai, i le puipuiga lea adaptation.

A tatou matau atu i le mea o lo o sosolo i ai ia tatou tupe, e ala i Tala o le Tupe a le Malo, o gaiouga o lo o fai, o le muamua lava o le puipui mai o aseta a le Malo e pei ona i ai ia tatou auala. Faasolosolo atu ai i o tatou falemai, faleaoga, ma isi tulaga faapena. Ma e i tatou fuafuaga faataatitia foi ia ua faamau i itumalo taitasi, ia outou afioga i sui usufono na saunoa mai, faalogologo mai foi i le tautalaga lenei, o le mea lena ou te talosaga atu ai, i mea ia tou te saunoa mai ai, pe ua i ai i totonu o fuafuaga ia ua uma ona faataatitia, i le faatalanoaga a le Malo ma outou itumalo.

A faapea e fou mai, e ese mai i fuafuaga ua uma ona talanoaina ma faamauina, ia o le talosaga lena, ina ia faapena ona tatou uia uma ia ala ia, ma faasolosolo atu ai ia tatou galuega.

Ma e o le mea moni lava ia, aua o lea ou te maua o ni isi o taligalu mo nuu ma afioga ua aafia ia le gataifale. Ia o ni isi o talosaga e le o maua atu e fia puipui mai ia aualatele. Ia o lea foi ua maua atu, ua afaina ni isi o nofoaga o lo o agai i ai ia tagata tafafao mai, **our tourism facilities**. O fuafuaga foi la a le Malo, e i ai ia le vaaiga a le Malo e faalatele lana gaiouga i le tali atu i suiga o le tau. E le faapea e na o le Matagaluega lenei e nafa ma le tali atu i le suiga o le tau, aua e le mafai e se Matagaluega e tasi, ona faia le galuega lena.

O lona uiga, ua faasalafa atu i Sectors uma lava o le atunuu, ina ia faapena ona fai i latou fuafuaga, ma faatino i lalo o Tala o le Tupe e fuafua, a lea Matagaluega ma lea Matagaluega, ia tatou Tala o le Tupe o lo o faasolosolo.

I luga lava la o le puipuia mai o tatou gataifale ma le fua o galuega talafeagai, a **sustainable**, o le a le gaiouga e gafataulimaina ae mafai ona foia ai le faafitauli o lo o aliali mai. O le mea moni, e leai se malosi o ia i tatou e tatali ai le mea lea e tupu o le siisii o le sami. Ma e a tatou vaavaai atu i faamaumauga a Saienitisi, o le a faatupu pea ma faatupu pea ia lena tulaga. O le mea la mo tatou o lo o faia faaiuga ma faatatau ia tatou tupe i auala tatou te tali atu ai, tatou te fuafua po o le a le mea e gafataulimaina.

O le isi gaiouga tele o lea ua alo atu i ai ia lo tatou Malo, i le itu lava lea o le siisii o le tai, ma e fai ma faataitiga le itu i Saute i Sasae o Upolu, lea na afaina tele i le Tsunami, o le a le galuega tele a le Malo na fai i i? O le fai o auala sola po o auala sopo, e o ese atu ai i lea vaega o le atunuu sa aafia ma e ono toe aafia i nisi o faalavelave faapea e tulai mai i lea taimi ma lea taimi.

E i ai isi o tatou eleele e mafai ona see i ai, ma ua saunoa soo foi ia i le Taitai o le Malo e uiga i lea faamoemoe. O le tatou finau pea e tatali ia le malosi o le siisii o le tai, o le lui lea mo tatou, po o fea e ave i ai ia le tatou

faamuamua? I a tatou tupe ma tatou tamaoaiga e maua i lea taimi ma lea taimi e tatou te tali atu ai i le faafitauli lea. A o le mea lena, o le faamuamua lena o lo o i ai nei, o le puipuia o aseta faitele e aoga mo le atunuu atoa faasolosolo atu ai i a tatou aoga, falemai ia o isi gaioiga e faapena e taua mo auaunaga lautele.

Lau afioga i le Fofoga Fetalai, o mea tau lisi o fanua o le Malo, ia e pei o le talosaga sa faatuina mai ona o se aoga. O le tali atu ma le faaaloalo e faapea, a faapea o lisi o lo o moomia i fanua o le Malo, ia auala mai i le Matagaluega o Aoga, faatau mai ai lea i le matou Matagaluega, e faapena ona fuafua atu i ai ia le Malo.

Ia o le mataupu lona 3, o le fesiligia lea o le tatou poloketi tele lea e i i Vaisigano. O le fesoasoani lea a le Faalapotopotoga lea o le Global Climate Fund, ma o lea ua amata i lona vaega muamua lea ua fai ai le pa tele lea ua i le ulu o le vai i Vaisigano ma puipuia ai na vaega tele, ia ona faapea ona faasolo atu ai i Leone faasolosolo atu ai lava i gauta. Ma e o se poloketi tele, ma e fai foi lea ma faataitaiga i lau faamatalaga lea na fai atu i le tali atu i le suiga o le tau, o le tatou taulaga i Apia o lo o taulai mai ai ia lo tatou atunuu. E tele le faitau aofai o tagata o lo o nonofo ma afifio ai, ua tatou matauina i lea tausaga ma lea tausaga i lologa ma tulaga faapena, e ao lava ona tatou galueina ia le Vaisigano ia ma le faasolosolo atu i uta, i le mea o lo o apo ma o lo o agai mai ai ai le suavai.

Ia e tele lava ia isi tala e ono fai atu foi lau afioga i nisi o mataupu sa laga mai, ia ae ona o le faamoemoe lava ina ia tuliloa ia le faamaea o le tatou galuega o i luma o le laulau o le tatou Tala Faaopoopo o le Tupe.

Afioga Alaiasa Muagututia Moefaauo Malagaitutogiai Sepulona Moananu: Lau Afioga i le Fofoga Fetalai..

FOFOGA FETALAI: Malie lau afioga i le Sui Palemia o lo o tulai mai ia le sui usufono o Anoamaa Sasae.

Afioga Alaiasa Muagututia Moefaauo Malagaitutogiai Sepulona Moananu: Ua matauina o lea ua lamalama faaiu ia le saunoaga a le afioga i le Minisita. Faafetai lava foi leaga o lea sa laga e matou lauga ia taligalu. E sao lelei le saunoaga a le afioga i le Minisita, o i le isi mea e tataua ona ave i ai le faamuamua a lo tatou Malo.

A ou vaavaai i le itu lea i Sasae i lo matou faaitu lea i Atua, ua toeitiiti lava laina tutusa ia le sualiu o le sami ma le aualatele. Ou te manatu o le isi 5 tausaga ua afaina ia le tulaga lea. Ia ae silasila foi o lea na folafola ia le tatou tupe e maua mai i le feagaiga lea na sainia i Paris e faatatau uma lava i i i le suiga o le tau ma le tatou siosiomaga.

Ia ae o le mea lea ou te manatu au ia, e leai se isi o tatou tali i le suiga o le tau nai lo o le fai o nai mea ia, e tau ina talitali ai ia le malosi o suiga ia ua tatou molimauina i le faamoemoe. Ia ae faafetai i le saunoaga matagofie a le Minisita, ia ae tatau ona finau malosi i totonu o finauga o le Tala o Tupe ia ave i ai ia le faamuamua i tulaga ia. Ia aua e tasi lenei afioga i le Minisita e malaga soo i fafo i fonotaga foi ia i le sainiga o feagaiga, ia faapea o le a i ai foi ia ni feagaiga foi ia o le a saina faapitoa mo tatou vaega ia o taligalu.

Ia o lo matou foi nuu toe lava ina oo mai i le aualatele, ia ma afaina atu ai ma eleele faamolemole, ia ma le agaga faaaloalo.

Afioga Sulamanaia Fetaiai Tautilili Tuivasa (Vaimauga Sasae): Lau Afioga i le Fofoga Fetalai e... mo le fia faasaoina lava o le avanoa i le afioga i le Minisita...

FOFOGA FETALAI: Ia tulai mai le afioga i le sui usufono mo le Vaimauga i Sasae.

Afioga Sulamanaia Fetaiai Tautilili Tuivasa: Faafetai lava, ona sa fai ia le lauga a le itumalo lenei i le po, ia na vaai atu e le i afio mai ia le afioga i le Sao Faapito. Ia ae e pei o le saunoaga a le Sao Faapito nei e pei o lea e lilifa le mea i le puipuiga o aseta lautele, ae e pei o le agaga lea sa avatu o le nuu lenei o Laulii. O le nuu lenei o le afioaga o lenei itumalo e leai se aau, o le moana atoa lava ia le tulaga lea e i ai. Ia e pei o i ina sa avatu ai foi le talosaga i le taimi na tulai mai ai, se i silasila ane i lenei afioaga, e pei lava ona ou fai atu toeitiiti lava aua o le ava atoa le mea. A fafati la galu, e fafati i tuafale o aiga se i tulou.

Ia o le matau atu foi ua leva ona avatu talosaga i auala e pei o i tua i le taimi ia na oso ai le Tsunami, se i o ai nei nuu i uta. O le tulaga la lea e i ai, na ou sau avatu ia le... i le fonotaga lea sa fai ma le UNDP sa fai po o Oketopa po o Novema, na avatu ai lea o nai au uo Papua, nai tamaitai na matou tietie atu. E ofo teine ia Papua ina ua oo atu i Laulii i le fafati o galu. E palaa foi na aua ou te le i oo i Papua ae e pei e fefefe. E faafefea ona ola ia tagata o lou itumalo i le le fefefe i sami?

Ia e pei o lea ua matau atu i le aotelega o le saunoaga a le... e pei faamolemole e toe tuu atu lava le afioaga lea o Laulii, e tuuaia ia pe taatia isi nuu o lou itumalo e moi o la ua i ai ia taligalu ae o le afioaga lenei i le maaleale o le suiga o le tau ua i ai. Ia o lea foi ua malele ia Lufilufi i le pau o le Susuga ia Lufilufi i le itumalo lea e agai atu i tua, e amata atu i i Fagalii ma nuu na, ua matuai mafatia lava, ia faamolemole lava. O le talosaga lea lau afioga i le Fofoga Fetalai e ala atu i le Minisita o MNRE faamolemole.

FOFOGA FETALAI: Malo, ia se i saunoa mai ia le afioga i le Minisita.

Afioga Hon FIAME NAOMI MATAAFA: Faafetai lava i lau afioga i le Fofoga Fetalai. Leai sa ou i i lava o saunoa mai le afioga i le sui usufono i lona itumalo, ma o lea foi e faamau i i. Ia e pei ona matau mai, ia o le agaga ia o le tatou felafolafoaiga i luga o faiga faavae ma fuafuaga lautetele. Ae o lea lava ua maua atu ia finagalo o afioga i sui usufono.

Ma e fai lava ma faataitaiga ia lau faamatalaga lea e fai atu, e tofu lava ia vaega eseese Sectors po o Matagaluega foi, ma latou fuafuaga e fai. O auala la aemaise le puipuiga o auala lea o lo o i ai ia tatou taligalu, e fai ma faataitaiga i le tatou LTA, ua i ai foi ina faataatia le latou fuafuaga i le tali atu i suiga o le tau po o le mea foi lea e taua faapea i le gagana faaPeretania, o le **Climate Proofing**.

Ia o le saunoaga foi a le faipule i le maua mai o tatou tupe, ia o lo o i ai lava tupe, ae a faapea o lo o mulimulitaia ia faamatalaga o fonotaga a le **Paris Agreement**, ioe, e manaia ia o le sainiga na afio ai le tatou Taitai i le 2015. A ua uma atu ia le 2015, ae e pei ua tau agai ona u mai autafa o le vaega lea e tele ia latou tupe.

O le mea lava ia, e tele tupe e ono maua. Ae o le mea foi lea ia tatou, o le tatou iloa o a mea e tatau ona fai? O faaoga tatau? Ma po o lava foi ia lo tatou malosi mo le faatinoga. Aua o isi lava lui ia e tulai mai i lea taimi ma lea taimi. E mananao uma e fai galuega, e lelava ia le aufaigaluega. E le gata i lelava o kamupani e latou te faia, ae o le isi foi taimi, e le o lava le tomai e faapena. Ae o lea lava tatou te taumafai. Ia ma le upu foi lava lea, gafataulimaina.

E mafai lava ona faaputu, faaputu tupe, ae a leai le mafai i se tulaga e gafataulimaina ia le tatou faatinoga o a tatou galuega, ia e tele foi le afaina o lena itu. Ae o lo o faamauina ia finagalo faaalua. Ma e o le mea la lea ou te faalogo atu i ai, ia o le itu lea i Sasae i Matu, i Anoamaa e sao. A faapea o le auala a tatou o i luga o faiga faavae o le Malo, e tatau ona ave i ai ia le faamuamua.

O le afioaga o Lauili lea e saunoa mai ai ia le sui usufono, ia e sao oe. O le moana o lo o feagai ma le afioaga. Ae o le fesili i lau afioga i le sui usufono, o tatou uma. E le o se mea e faapea e nao le toatasi pe na o nai itumalo e mafaufau i ai, a fai le itumalo e tasi e puipui mai ai ona gataifale, ae faafefea ia isi? O le a ia le tatou faiga e fuafua ai le mea e ave i ai le faamuamua? Po o le mea e tatau ona fai nei lava? Ia po o le isi galuega e mafai ona tuutuu atu i tua.

Aua o lea lava tatou te iloa lau afioga i le Fofoga Fetalai ma le mamalu o le Maota, o le tele lava o lo tatou atunuu, o tatou nuu o lo o i ai i gataifale. O le **dwelling** a tatou **is on the coast**. Ae o le isi lui lea mo tatou mo le

mafaufau, 20 tausaga, 50 tausaga, 100 tausaga o le sao lea? Ma alu i ai ia le tatou tamaoiaiga?

E oo foi i le Malo, e i ai foi le taimi o la e talatalanoa pea le Malo. E oo lava i le Palemene lenei, po o lelei pea le tulai o le Palemene i lenei nofoaga e ui o lea faatoa uma atu ona toe fai ia le tatou fale, pe a fua i le sami la e tuu mai i o.

Afioga Sulamanaia Fetaiai Tauiili Tuivasa: Lau Afioga i le Fofoga Fetalai e le fia faauilavea le sui usufono lenei o Vaimauga e tumu i le faaaloalo i le... ae pei o lea o le a....

FOFOGA FETALAI: Ia saunoa le sui usufono o Vaimauga.

Afioga Sulamanaia Fetaiai Tauiili Tuivasa: Ua fesili mai i lenei itumalo, e ala la ona ou taua ia le nuu lea o Laulii, se i tulou lou afioaga, ona a silasila i Laulii e le mafai ona alu ni taavale i uta o auala galue. E pei ona ou taua, o lou nuu ia o Fagalii o lalo o le taligalu lea e i ai, ma e maua foi tagata e nonofo i uta i mea maupuepue. Alu atu foi i Letogo, e i lalo isi ae i luga isi. Ae oo loa la... e faapena foi i Vailele, e i lalo isi ae e i luga isi. Ae na o Laulii lava e leai ni tagata e nonofo i luga o mauga. E mafua i se a? O la na saunoa le Minisita e le mafai ona o ni auala i luga. O le ala la lea o lou faamuamua atu ia Laulii, e alu atoa lava i lalo ia le... faafetai lava i lenei itumalo leaga e tatalo ona tagata.

E pei ona ou fai atu e pei o le itumalo lenei o Vaimauga aemaise lava... o Isaraelu lava lea. E le o i ai la se mala e oo mai, ae o le popolega lenei, o lea foi e faamuamua mai, e oo i luga o mauga e le o oo i ai ni auala galue. Fai mai le Minisita e le mafai ona sua. O lona uiga la a siisii nei le tai, ia o mai lava le sami alu atu tagata aua e leai e sosola ai i luga. A sosola e leai ni auala. A sosola atu i tua ae pa pa mai vai ona o le nuu lenei o Vaimauga lea na taua e le isi sui usufono, o vai lava e faamanuia ai le atunuu. E pei la o le tatalo atu ona o lea ua fesili mai le Sao Faapito, o le ala lea. A tou vaai i le tamai matagi lea na agi nei, na muamua lava tau i Fagalii ua i lalo uma mo mea o...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Se i saunoa atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Masalo o lea e faafofoga atu le Kapenenta, taatia mai. Ua e saunoa mai nei i mea faapena, ae sao oe

e aafia ai Laulii, ae o lea foi e aafia ai le toatele o tatou sui usufono. E oo foi i lou nuu lea o Saleapaga. O Saleapaga, e leai se mea e sosola i ai tagata, na o le matafaga fale, mauga loa tu sao i luga i le lagi. O le ala lena e ala ai ona oo i le...tusa lava e 49 tagata na feoti i le tsunami lea na sau. Ona o le mauga lea e i tuafale e alu atu lava ii e tau i o i Lalomanu, e leai se mea e sosola i ai. Ona sau loa lea o le tsunami, o la e sau, sau, sau tau loa i le papa mauga lea, ma alu ae ai i luga ma taavilivili ma feoti ai le toa 49 o tagata. E toatele o tatou itumalo o lea e lavea i le mea lea. A o lea ua uma ona saunoa atu le Minisita e taatia mai. O le atunuu e pito sili ona tele tupe tele le tamaoiga o Amerika. Ae ua ou leiloa pe ua 5 ea tausaga pe a, o le Peresetene lea talu ai, o Obama, na alu alu lava taofi le Malo, tapunia le Malo ua leai ni tupe, faatali se i fonu le Palemene, le latou **Congress..o** se mea uiga ese lea ina ua ou vaai atu i le TV ua sau ai, ua **closed down le government**. Ua leai se mea, ua leai se tupe, faatali se i fai pe pasi le tala o le tupe.

Lau Afioga i le Fofoga Fetalai, e faapena foi tatou, ae fai faasolosolo. A maua mai lava se seleni i le tausaga....O le mea lea e taua tele le mataalia o le Minisita o Tupe ma le Minisita o Tupe Maua e tausaili mai, ina ne i oo lo tatou malo i le tulaga lea ua oo i le malo o Amerika. O le Malo e pito tele tupe i le lalolagi. Ae na alu alu lava close down. Leai se mea e mafai ua leai se tupe, se i faatali i maota e lua, Maota faitulafono pe pasia le tala o le tupe a le Peresetene pe leai. Na o sina ata faaemo, vaai ane ia i si o tatou tamai malo. E pau lava le mea lea e fai ia i tatou o le fuafua tatau ma posiposi nai mea ia e maua i o tatou lima. Ae taatia mai.

Afioga Sulamanaia Fetaiai Tauilliili Tuivasa: Lau Afioga i le Fofoga Fetalai, e malomaloa foi se tagata ae tautala soo. Ae na ona faamalulu atu i lena itu. E pei ona avatu foi ni tuualalo a lenei sui usufono, o lea foi ua fesoasoani mai le Taitai i ana Minisita, ona o le faalavelave la, e sese lana faataitaiga. O Aufaga la ua uma ona fai auala e o ai i uta. A na faataitai mai i se itumalo foi lea e leai ni auala, a o le taimi lenei ua i ai auala.

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o Saleapaga lea ou te talanoa atu ai, o Saleapaga, mauga. E talu lava ona ou sau i i nei i le Palemene, aumai au i gauta i le Ofisa o Aoga i lena taimi. E oo mai nei lava, e le mafai ona alu se auala i luga, mauga papa, e tu. O le a la le mea e fai. Ua oso atu i i Lepa le alatele i le auala, i i le nuu o au, ona alu ai lea i luga, ona faatoa mafai ai lea ona o ifo i tua. E leai ma se auala e mafai ai ona alu i luga o le papa, ae o Saleapaga lea ou te talanoa atu ai. Lau Afioga i le Fofoga Fetalai, e ese le manaia o lou naunau, faafogafoga mai le itumalo i lou naunau, ae taatia mai, e le uma le fai aso.

FOFOGA FETALAI: Malo, o lea ua saunoa atu le Taitai o le Malo e le uma ai le faiaso, o le a silasila i ai le Malo e tusa o lou naunau mai. Talosia ia, e toe faamanuia i lea palota, e faapena lava.... Faaauau galuega ua le uma i lenei tausaga. Tulai mai lau Afioga le Sui Palemia.

Afioga Hon Fiame Naomi Mataafa: Lau Afioga i le Fofoga Fetalai, o le mea taua lava o le momoli mai o lou finagalo. O lea e faamau atu e le tatou Malo, ma o lea foi e avatu le matou faamatalaga i le fuafuaina ma le faafoeina o tatou galuega faagasolo. Lau Afioga i le Fofoga Fetalai, ua uma ai i i nai mataupu sa laga mai, manuia tele le tatou Fono.

FOFOGA FETAI: Ua maea saunoaga a le Kapeneta, ae tapa lau afioga i le Palemia mo sau saunoaga.

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai faapea foi le mamalu i sui usufono. O lea ua sausaunoa atu afioga i Minisita. Ou te manatu foi, ua tele lava ina aofia uma mataupu, ua saausi foi tali a Minisita. Ae o le tulaga lava ia e le uma le fia fai mea lelei, Ae i ai toa e faafeagai ma tatou, O lo o faafogafoga mai, a maua mai foi seleni, ae tele le isi toa, o le gafatia e o tatou tagata faigaluega. E oo foi i seleni aumai mai fafo, e i ai foi aiaiga faatulaga ina ia i ai se leo o faalapotopotoga nei e aumai ai seleni e pei o le faalapotopotog a le lalolagi ADB. E fia silasila i tapenaga ua tatou faia, aemaise tapenaga o ata, o tauofoga, latou te fia iloa ma aumai foi se latou finagalo. E mafua ai ona tuai isi a tatou gaoioiga ona o lea e fesootea pea ma faalapotopotoga ia mai fafo, na aumaia le seleni. Na mafua ona faia uiga ia lau afioga, ona e toatele atunuu o le lalolagi, ua ave i ai a latou fesoasoani, ae sue atu ua leai ni mea o faia, ua faaoga sese seleni. O le taua ia o le itu lea, o lea ou te faalogo pea i faasalalauga e fai e tagata le malamalama. Ai foi o nei fesoasoani o le a pule le HRPP, faaoga e latou i mea e le talafeagai. O le ala lena e ala ai ona tuai isi gaoioiga e fai. E oo foi pe afai ia tauofoga, e fia tilotilo foi faalapotopotoga nei o le lalolagi ia i latou na tauofo. Po o le a le latou faamaoniga e i ai se tomai. O a ni galuega tetele sa latou faia. O le puipuga foi lena, ua tele foi atunuu ua avatu kamupani a aiga e faatinoa. A o toa uma ia, e ala ai ona tuai nisi o a tatou galuega.

Ua tatou faalogologo soo i le upu lea, faafitauli i mea tau **capacity** mea tau faatinoga o galuega. E tele taimi o lea ua outou faafogafoga e taunuu mai ai seleni, ae tuai ona faaoga ona o lea e faatino aiaiga ia na aumai ai. E le fai mea tuulafoai faalapotopotoga nei. Ona e aumai, ae latou te fia iloa e oo lava ina auina mai a latou savali e aumai e siaki. E o mai e toe siaki

ma talatalanoa i **Private Sector**, aemaise faletupe. E fesili i ai i se latou finagalo.....I le tulaga o le faatusatusaga o Samoa ma isi atunuu, e tu maualuga lava Samoa.Ona o le tulaga pe a faatusa Samoa i isi atunuu. E maualuga tele le faatulagaga o tagata, le aufaigaluega i Samoa nei a le Malo, e maualuga. I le faatusatusa, ae le i taitai lava i le vaai a le tatou Malo ma i latou i le taimi e faatino ai galuega, i le tapenaga. O lea foi la na alu atu i le saunoaga faamanino a le isi Minisita, le auala lea i Maliolio, ua leva ona maua le tupe a o lea e tau tapena le galuega tau pepa, i le manatu o faalapotopotoga a le lalolagi na aumai ai i le faletupe. Ia sao ma atoatoa, aua lava ne i i ai ni mea e faaletonu.

Ona aumai loa lea o tapenaga lenei, ona tilotilo lea o Faletupe o le lalolagi i galuega tetele sa fai e kamupani nei. Ma o latou filifilia ai le kamupani lea mai Korea i Saute. O lea foi la na... e lelei lava i le vaai. O mai latou vaai fai ni **tests** ae le faapea foi e faamaoni pe lava le malamalama o tagata uma, e oo lava i Kamupani tetele. Ae o le faalavelave e mulimuli lava i faamaumauga o le mea lena e limataitaina ai. E le mamao atu pe o le taulotoaiga o le tausaga lea, na tatala ai le isi auala tele i Italia, lea na sau i le TV. Pei lava e le i atoa le masina na tatala ai ae malepe, **collapse**, ae na fau e inisinia... sa i ai inisinia ma latou malolosi. Collapse, pau ifo lava, toatele tagata na feoti ai. O le masina o Setema i le tausaga 1989, na ou alu ese mai ai... ua ou savali ese mai ai ma totonu o lou potu o le a ou check out mai le hotel, ou te malaga atu ai ma te feiloai ma le Palemia i Singapore. O le a ma felelei i Saina i le malaga lea na ma o ai, ma fai ai le aisiga, lea na maua mai ai le seleni lea na fau ai le faletele muamua lea o le Malo, lea e i ai nei ofisa tetele ia o le Malo. Ou te oo mai loa i fafo ou faalogo atu ua sau le **break news**. Ou alu atu loa ou tilotilo i le TV, tilotilo atu faatoa malepe lava malepelepe le tele o auala laupapa i totonu i LA.i le mafuie na lulu, e toatele tagata na feoti ai. Lau Afioga i le Fofoga Fetalai, o uiga ia... po o le a lava le tau mai o tagata popoto, ae oo loa i le taimi e agi mai ai le malosia lea o le foafoaga a le Atua, e pei lava o le mea fua, pe a le lelei ona faufau.

Lau Afioga i le Fofoga Fetalai, e i ai le manatu o lena ua tali atu Minisita e tusa ai o outou finagalo ma talosaga. Afai e le faamalieina, pe le oo i ai, ae ia e manatua o le tele o isi mea ia tou te lauga mai ai, o lea ua taoto i fuafuaga a lo tatou Malo. O lea ua taoto fuafuaga, e faatupe i le taimi e i ai seleni. Lau Afioga i le Fofoga Fetalai, e i ai isi auala a tali atu le Kapeneta, matou te faaaogaina, e seasea ona matou tautala i ai. O le isi auala o le tali sao atu manino, o le isi auala o le tali ah.ah... o le isi auala o le tali atu i le faiga **faa-reverse psychology**. O le a le uiga o lea mea, e tali atu foi lele e faatei oe, a e tei loa tu mai, ona iloa loa lea e le Minisita, ah... o lena e te mataala. E te le o moe, ona avatu loa lea o le tali, o le tali ua leva ona e fia faalogo i ai. E auala atu i le Minisita pe auala atu i se isi o matou, o metotia

eseese na e faaaoga e matou. Ae a oo loa ina faaaoga le metotia lea, o lae e i ai i tua le agaga. O le a le agaga? Ia faalologo uma le Maota ma faalologo uma e na fesili, faafogafoga mai le atunuu i le taua o le fesili ona avatu loa lea o le tali atoa, o tali e fia faafogafoga foi i ai le atunuu.

Lau Afioga i le Fofoga Fetalai, e i ai le mataupu sa laga, o le mataupu muamua ou te fia taua. E i ai sui usufono a tutulai mai e saunoa ma faapea lea, e talu ona ou sau, e leai se mea o faia i lou itumalo. Lau Afioga i le Fofoga Fetalai, e pei o se manatu faaataata a lafoga. Ae le mama i le Kapeneta, ona o lenei e lua auala tetele lava o lea e faaaoga e le Malo. O le fesoasoani e avatu faapitoa lava i ai i lou itumalo, ma le fesoasoni e avatu i le tulaga lautele, e faaaoga uma lava e tagata o le atunuu faatasi ai ma lou itumalo. O lona uiga e le o avatu i le itu pumoomoo, le itu vaapiapi, ae o lo o avatu i le tulaga lautele. O se faataitaiga, o le mea lea e ave i ai le faamuamua a le Malo pe a oo mai, o le tulaga i atinae. E matua le aoga atoa lava lau atinae e fai, pe a le lelei auala e aumai ai i totonu o faatoaga. E matua le aoga lava ni mea e aumai i Savii pe a aumai i inei pe a le lelei vaa. O vaa ia e feoi ai tagata o lou itumalo, e le mafai ona faatinoina ia faalavelave fai, lea e te fia malaga ai i Savaii pe a le lelei vaa. O ituaiga fesoasoani na, e tatau lava ona paleni, e i ai le vaega e avatu tuusao mo na o lou itumalo, ma le vaega e manuia uma ai tagata uma o le atunuu. E le mafai ona laaloa ai le vaai a le Malo, e i ai foi tulaga o isi mea faapena o lo o agai i ai le tatou Malo.

O eletise, e alu lava manatu o la foi ua fai le atinae eletise i le vai le la i le itumalo le la, o la ua manuia ai le itumalo. Ae soa loa e se taavale se poumoli e tulata i le masini lea e latalata i le vai lea, e pepe uma lava nuu uma. E tasi lava le agi a se afa ae pepe uma le atunuu atoa. E afaina ai ma faleoloa e teu mau ai ola e tatau ona tuu aisa. A le televave la le toe faaleleia, e leaga uma lava mea ia, tele le gau, pe faitau miliona, miliona, ma miliona tala le tupe e gau ai faipisinisi nei. O lona uiga o le eletise o le atinae e manuia uma ai le atunuu atoa.

E oo foi la i fesoasoani mai fafo, e tupu loa se mala sau loa fesoasoani mai fafo. E pau lava le mea lea e manatu ai le tagata i i? O a la mea ou te maua i i? O a la mea e maua e lou aiga? Ae galo ai, o mea e fai e le Malo, ina ia manuia ai tagata uma o le atunuu, e pei foi la o le misela. O fesoasoani uma lava ia e aumai mai fafo, e auala mai i le misela, e auala mai i faalapotopotoga tetele a le lalolagi. E tasi lava le mea e aumai ai, e agai mai ina ia faalelei ai le tautua a le Malo ina ia tutusa le fesoasoani e tuu atu i tagata o le atunuu. E le faapitoa i se tagata e toatasi. Lau Afioga i le Fofoga Fetalai, o le mea lena e fulisia i ai meaalofa ia e aumai. O lea e aumai mai fafo i faalapotopotoga tetele. Se i vagana foi i latou e o mai lava i latou ma a latou mea, e ave sao lava i aiga ia. O le faiga lena, e sili atu ona fiafia le Malo. Aua a o mai lava latou ave sao, e le faitioina le Malo,

ae tago loa i ai le Malo e faasoa, faitio loa le Malo. O ai a sii a o ai a faasavali.

Lau Afioga i le Fofoga Fetalai, o le tulaga aoao lena e fesoasoani i taimi o puapuaga. E aumai lava i le Malo, ona lafo lea e le Malo e faia le faaiuga mo tagata uma e le fai mea faapito.

I le tulaga o pepa fanau lau Afioga, sa i ai le manatu o se isi, faitio po o ua le faaaogaina ia pepa papatiso po o pepa papatema. E i ai le isi alii ou te iloa, na alu ma lona tusi folau i Niu Sila, i lona igoa matai, o le a ou faaigoa ia i le igoa matai o Fetau. E atoa le tausaga ae tipoti mai Niu Sila i le **over stayer**. Fai mai lea o lana tala ia te au, “E te iloa le mea, ou alu loa fai le isi ou igoa matai” Alu loa toe fai le isi igoa matai, sau i le ofisa o le immigration, fai na e alu, leai ou te le i alu lava i Niu Sila. O le a lou igoa matai na e fia alu ai? O Poumuli. Na fai le tusi folau alu. Alu atu loa fai le toalua, ono masina ae misa ma le toalua, lipoti loa e le toalua i o, tuli mai ai loa, tipoti mai. Ona sau loa lea, e i ai le isi ona igoa matai e tolu ai ona igoa matai, o Nonufiafia i le isi foi nuu. Ona alu foi lea toe fai lona igoa matai. Na e alu i... leai a, faatoa ou alu lava lenei, alu atu foi sao foi. O le taimi la lena e le i suia tulafono ona o faafitauli nei. Ona alu loa lea, toe sau loa lea, o le taimi la lea na ma fetau ai ua sui ua alu, ua lua ona tausaga i o toe sau, sau ai i lona igoa matai lea. Ou fai atu, o ai la lou igoa matai lena, se o le matou nuu, o au lea ua igoa ia Seasea. O le seasea o le fruit, ae o le ata lea e ata ai le sui usufono lea, e leaga le mea lea e ataata mai i i. O lea la ua sao ai. Ua maua nei la e le Malo o Niu Sila, fai mai sole, leitioa matua tele nei over stayers i Niu Sila, ona o lea e i ai outou igoa matai. Ona sui ai loa lea o le faiga lea ua i ai nei, na o lou igoa papatiso lea ua faaaoga, o lea ua tutusa lelei ma lou igoa taulealea. A outou silasila i outou tusi folau na e i ai mai le 2000, ua sui atoa ai le faiga ona ua matua paso le malo o Niu Sila ma Ausetalai, o le tele lena o le mea lea e tele ai over stayers, o le tatou faiga faavae lena o le faamatai. O lea la ua faaaoga nei igoa papatiso. O le a la le mea lea ua tupu, ua agai loa i igoa papatiso ia le togafiti lea ua fai.

O le ala lena ua ala ai ona fai le faiga lea, se i taomia ai togafiti eseese. O outou manatu foi, le tala ia Iesu ma lona ausoo. E tolu lelei tausaga o matamata le ausoo i vavega, talitonu ai o Iesu lava lea o le Atua. Ae nofo le isi ula faatau lo tatou Alii, ae o le toeaina lea na tofi faapitoa e Iesu e avea ma faauluuluga, o le uluai faauluuluga o lana ekalesia. Na ona maua lava i le tulimau fesili, “E te masani ia Iesu?” fai mai “E leai, ou te le iloa lena tagata. E ala ona ou taua le mea lea, ina ne i te i ua manatu o pepa papatiso ma pepa papatema, e sainsi ai agelu. Afai o tagata nei e oo lava ia Toma, na feoai ma Iesu, ae leai lava se faifeau o soifua mai na feoai ma Iesu.

O le tali lena lau afioga, ae masalo ua matagofie ai, e oo lava i pepa fanau, e oo lava i ai le le sogasoga o matua ona o le mea lenei, o le fia o ese

ma le atunuu lenei matagofie na aumai i le Atua, ina ia o ese atua ai i fafo. O le tulaga lena e tali atu ai i lea foi mataupu na aumai. O le isi fesili, sa fesiligia ai ai leoleo faatatau i mea nei o aisa. Lau Afioga i le Fofoga Fetalai, ou te le iloa po o ua faafia na alu **reid** a leoleo. O le isi nuu o le tatou atunuu ua lauiloa e reid nei ae toe fai foi taeao. E reid taeao ae toe fai foi i tala atu. Le mea lava lea o le fiafia, e fiafia e fai le mea sese. O le toatele o tagata o lea ua ta loka e leoleo, o le ala lena o lea e tumutumu ai uta i Tafaigata le tatou falepuipui. Ua toatele ai, ona o le tulaga i le aisa. Ma o lo o taumafai pea leoleo e fai le latou galuega, ina ia mafai ona pue ai i latou nei o lo o faia pea lenei soligatulafono. E pei la o mea na laga mai ia te au.

Ma ou te faatuina le lafo lau Afioga, *se manatu fautuaga tatou agai loa e auiliili le tatou Tala o le Tupe*

FOFOGA FETALAI: Malo faafetai. Ua maea ona tali le Malo e tusa ai o mea sa laga e sui mamalu, ua maea nei le felafolafoaiga i luga o le faitauga faalua.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopopo (Nu 1) 2019/2020 i lona faitauga faalua.

TULAFONO TAU FAAOFI O LE FAATATAUINA O TUPE FAAOPPO (NU 1) 2019/2020 - iloiloga auiliili

FOFOGA FETALAI: O le a sagai atu le Fono Aoa mo le iloiloga auiliili o le Tulafono Tau Faaofi o le Faatatauina o Tupe Faaopopo (Nu 1) 2019/2020.

I le faagasolo o le iloiloga auiliili o le Tulafono e mafai ona saunoa, faatepa sui usufono i mataupu o lo o tusia i le Tala Taatatau Nu 1 o tupe faaopopo a le Malo o Samoa tausaga e faaiuina i le aso 30 Iuni 2020, faapea foi ma le lipoti a le Komiti o Tupe Maua ma Tupe totogi i le Tala Faatatau Nu 1 o le Tupe Faaopopo, i le Pepa o le Galuega 2019/2020 Nu.123.

E tusa ai ma Tulafono Tumau e 105, e amata le Iloiloga Auiliili o le Tulafono Tau Faaofi i ona Faamatalaga.

FAAMATALAGA MUAMUA

VAEGA MUAMUA O LE FAATATAUINA O TUPE

MATAGALUEGA FAAMATALAGA AOFAI O TUPE ALU

PISINISI, ALAMANUIA MA LEIPA

\$64,055.

Faamaonia.

TUPE:

\$10,743,251.

FOFOGA FETALAI: Se i tulai mai le sui usufono mo Gagaifomauga Nu.3.

Susuga Hon LAAULI POLATAIVAO LEUATEA: Lau Afioga i le Fofoga Fetalai, ou te fia fesili atu lava i mea taitasi ia i le disaster and emergency facility faamolemole, e \$8,462,707. Ma le agaga faaaloalo e tuuina atu pea i tafatafa o le Afioga i le Minsita o Tupe, ona o le tatou aafiaga foi lea, faafetai o lea ua faatu le tulaga o lenei foi atinae taua aua ni faalavelave tutupu. A o le talosaga lau Afioga, o i ai se fuafuaga a le tatou Malo i ni compensation mo nai tagata sa aafia i le tatou faalavelave lea na alu nei, e i ai le faamoemoe o isi foi tatou faalavelave muamua sa tutupu pei ona i ai le Tsunami, sa tele lava le fesoasoani a le tatou Malo na fai, e le gata o le state funeral, o pusa maliu ma mea uma sa fai. Ae pei o le agaga na ona tuutuu atu i ou tafatafa pe talafeagai i lenei taimi, e 84 tamaiti, o lea foi e maua e i ai faiga faavae a le NPF ma le ACC e tai \$5,000 a le tagata, ae na ona tuu atu i ou tafatafa masalo e le atoa se \$100,000 e alu ai. Ma lou agaga faaaloalo.

FOFOGA FETALAI: Ua tulai atu le Palemia.

Susuga Hon TUILAEPA AUJELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le tulaga lea e aafia ai faiga faavae a le Malo ua uma ona oo i ai lau faamatalaga, o fesoasoani e aumai e ala mai i le Malo mai Faalapotopotoga e agai i le tulaga lautele, a o fesoasani ia e aumai e auala mai i tagata tuusao, o lena. Ma o le tulaga lena e tali atu ai i le fesili lea e aumai.

Faamaonia le \$10,743,251 mo Tupe.

SOIFUA MALOLOINA:

\$3,933,000.

Faamaonia.

**FAAMASINOVA MA PULEGA
TAU FAAMASINOVA:**

\$504,455.

FOFOGA FETALAI: Ia se i tulai mai le sui usufono mo Salega Sasae.

Tofa OLO FITI AFOA VAAI: Lau Afioga i le Fofoga Fetalai, i le Output lona tolu faamolemole lau Afioga i le tulaga o... Lau Afioga i le aso ananafi, sa ou savalivali lava i le matou fale ma le malie lelei o lou loto i le saunoaga a le Palemia i le tulaga o tatou faamasino. Faafetai atu foi o la ua matuai... ou te iloa ua tele tatou faamasino Samoa i le Faamasinoga lea o Fanua ma Suafa. Ae na pau lava lea o si vaega lea e fia faafesili atu ai i lau Afioga i le Minisita mo Faamasinoga, ona ou te matauina lava e pei e faale o lava luga i le Supreme. Po o le a se tala po o se faamalalama i le mea ua tuai ai ona tofi se tatou Faamasino Sili. Ou te iloa po ua ova ma le valu masina e le o toe i ai se na mea i totonu o le tatou Faamasinoga.

Susuga Hon TUILAEPA AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai o au la ou te tali atu i le mataupu lena, o lea lava ou te mafaufau.

FOFOGA FETALAI: Ia o le tali lena.

Tofa OLO FITI AFOA VAAI: Lau Afioga aua o lea e lua ou avanoa. Ia aua o lea ou te malamalama lelei lava faapea o la e faatalitali i se musumusuga a le agaga. Ou te toe fesili atu po o mafuta lelei ma le Atua pe a.

Susuga Hon TUILAEPA AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: O lau tali atu foi la, e auala mai i lou mafaufau le musumusuga a le agaga.

FOFOGA FETALAI: Ia ua uma avanoa o le sui usufono.

Faamaonia le \$504,455 mo Faamasinoga ma Pulega tau Faamasinoga.

LEOLEO: **\$158,073.**

Faamaonia.

TIUTE MA TUPE MAUA: **\$211,706.**

Faamaonia.

FONO AOAQ FAITULAFONO: **\$210,000.**

Faamaonia.

**GALUEGA TAU ALAMANUIA
MA ATINAE A LE MALO:** **\$38,696.**

Faamaonia.

FUAINUMERA FAAMAUINA: **\$829,988.**

Faamaonia.

**PULEGA A SAMOA MO TAGATA
TAFALAO MAIMOQ:** **\$253,000.**

Faamaonia.

PULEGA O FELAUAIIGA I LE LAUELEELE: \$2,300,000.

FOFOGA FETALAI: Tulai mai le sui usufono mo Gagaifomauga Nu.3.

Susuga Hon LAAULI POLATAIVAO LEUATEA: Lau Afioga i le Fofoga Fetalai, o se mea laitiiti lava lea, e faamamafaina le Taufusi Road Works. Ma le agaga faaaloalo na ona faaoololomaau i lau Afioga i le Minisita mo Galuega ma Atinae Eseeese ona o le mea lava lenei o le specs o tatou galuega, o le mea lava lea e mafua ai ona le umi tatou galuega, ona o specs lava o lo o seti atu e le tatou Matagaluega. Ae i ai lava le agaga o le tau faamaualuluga laitiiti o tau a ia umi ona aoga. Lau Afioga ou te faatepa lau Afioga i le galuega lea e fai atu nei mo le malae vaalele, se i toe silasila ifo lava i le ta la e faata ai le auala, ua leai lava se eseese ma le ta sa i ai muamua, patupatu, omoomo, valavala. Na ona faapena atu i lau Afioga, e manaia lava le asphalt lea e alu atu i Malifa e tau i Saina. Pe na ona faapena atu i lau Afioga se i e silasila aua le umi ona taua o lea galuega ua fai foi si taugata o le tau lea ua tau mai. Ma le agaga faaaloalo.

Susuga Hon PAPALIITELE NIKO LEE HANG: Lau Afioga i le Fofoga Fetalai, ou te faamauina le finagalo a le sui usufono mamalu, o le tapenaga o le auala lea mai Taufusi e aafia ai auala savali ma alavai ma e talitonu foi o la e tapena lelei specs o le galuega lea ina ia aua ne i aafia tulaga lea e saunoa i ai le sui usufono mamalu.

O le tatou auala foi lea e agai i le malae vaalele, e sao foi le saunoaga a le sui usufono mamalu, a o lea e tapena se galuega e fuafua i le tali mai a le World Bank ina ia asphalt tatou auala ia e faaoga mo le taimi nei. Ma lou faaaloalo lava.

Faamaonia le \$2,300,000 mo Pulega o Felauaiga i le Laueleele.

**AUAUNAGA TAU FALEPUIPUI \$4,350,729.
MA LE TOEFUATAIGA:**

FOFOGA FETALAI: Tulai mai le sui usufono mo Salega Sasae.

Tofa OLO FITI AFOA VAAI: Faafetai i lau Afioga i le Fofoga Fetalai. Na ona faafesili atu lava e i ai lava nai fesili ia pe tolu. O le fesili muamua; pei o le faatolu ai lava na ou vaai atu i Tala o Tupe ia o lo o aumaia ai lava le tulaga ia o le pa o le falepuipui. Manatua le Afioga i le Minisita, o le main budget o le 2016/2017 na aumai ai foi le miliona i totonu lea na pasia

atu mo le pa ma se vaega o le access road i o. Oo mai i le Supplementary o le 2018/2019 ona toe avatu foi lea o le isi \$150,000, a o lea foi ua ou toe vaai atu i le Supplementary lenei o le 2019/2020, o lea foi ua toe avatu ai le isi miliona ma ona tupu.

A silasila foi la i mea ia o tane vai lea foi ua ou vaai atu ua toe aumai, o le Supplementary o le 2018/2019 na avatu ai le \$600,000 i mea o tane vai. Oo mai i le main budget o le 2018/2019 avatu ai le \$446,000, a o lea foi ua toe oo mai i i o lea foi ua toe avatu ai le isi \$300,000 i tane vai, ua matua fesiligia lava e lenei itumalo lau Afioga i le Fofoga Fetalai le faiga o le galuega lea i o i le falepuipui. E oo foi i access roads, e faatolu foi ona avatu tupe e fai ai le auala lea e alu i o i le falepuipui.

Lau Afioga i le Fofoga Fetalai o le talosaga a lenei itumalo ona o le Okika lea e i lalo o lau vaavaaiga ma le Palemene lenei, ae ou te talosagaina lau Afioga i se faatagaga e tatau ona value uma assets la e i uta i totonu o le falepuipui se i tau faafetaui ai le mau tupe lea e avatu i i a o lea lava e talosaga mai e le i uma a. E pei o se talosaga lena lau Afioga, aua o oe e te pule i le tatou Suetusi Sili. Ma le agaga faaaloalo.

FOFOGA FETALAI: Ia, se i tulai mai le Taitaifono o le Komiti o Tupe.

Afioga ALIIMALEMANU ALOFA TUUAU (Taitaifono, Komiti o Tupe Maua ma Tupe Totogi): Lau Afioga i le Fofoga Fetalai ona o le isi vaega o le fesili o lo o agai i le Tala Faatatau o le Tupe. A matau e le sui usufono mamalu, masalo e ese lau matau i vaegatupe ia sa e faalau mai. O le vaegatupe muamua a lea sa i ai, o le pa lava lea e tasi, lea faatoa faaalu sao lea i le Tala Faatatau o le Tupe ona e sao sa i ai i le Tala Faatatau muamua o le Tupe i le faatoa amataga mai, ae sa le faatupeina ona sa leai se tupe sa i ai. O le pa lea e faatupe mai e Iapani, lea la sa faaaoga vaegatupe a le Ofisa o le Tupe e faatupe lea i le taimi lena, o lea la faatoa faatau pasi a Iapani lea sa aumai i le SIDS, lea a outou tagatagai i ai lena e i ai foi ma le vaegatupe lena e i ai i le aotelega na maua mai pasi, o lea la faatoa effective le transaction, po o lea faatoa faatino le fefaatauaiga lea. O le tupe la lea faatoa sau tonu lava i i lea o le a ave e faatumu ai le tupe a le Ofisa o le Tupe lea sa faaaoga i le faiga o le pa lea, ae le faapea e tele ni pa. O le pa lava lea e tasi lea na tatou talanoa i ai ae le i faatupeina, e le i... aua manatua foi o mea na sa e saunoa mai i ai o mea o budgets, o mea o fuafuaga e le i taunuu. E le faapea foi la a sau ai ona faataunuu uma lea o mea i le taimi lena. E i ai le taimi e toe fetuunai ai vaegatupe i mea e manaomia. E oo foi la i tane vai, atonu ai e te le i toe asiasi i uta i le falepuipui. E ese lava tane vai la e i luga la e aumaia le suavai i le falepuipui, ese tane vai fou lea e fuafua e sau sao lava le vai o le timu lea

ma faaoga mai i fale nei e alu sao i ai e faa-reserve ina ne i i ai se mea e tupu i tane vai tetele ia sa i ai i le amataga, a o la e i ai se faaleoleo. O tane vai la ia e i fafo mai e i talaane o le ofisa.

Ia o le tali atu lena agai i fesili agai i le tupe. O isi vaega, tali mai pea i ai le Malo, ae ou te talitonu lava i talatalanoaga ma le Ofisa Suetusi faapea foi le Ofisa Sili o Tupe, sa afea foi i a matou talanoaga le uma atoatoa loa, o lea e maumaututu lava tau ia po o historical costs e aumai mai tupe. O mea na e tau o historical costs o cost na e faamaumau lelei i totonu o tusi, a o le value ina o le mea la lena e fai mulimuli, e tele foi tupe e toe alu ai, a o lea ua uma ona afea foi i sa matou talatalanoaga ma lea vaega.

O le tali atu lea. O nisi o vaega sa fesiligia ia tali mai pea i ai e e talafeagai i ai le fesili. Faafetai.

Tofa OLO FITI AFOA VAAI: Lau Afioga i le Fofoga Fetalai o lou avanoa mulimuli lea. A gasea lava lau Afioga i le Taitaifono e tau tali mai, o lea na ou fesiligia i le faaogaina o mea ia na estimate mai lea na aumai i le budget. Ou te malamalama lelei lava i le mea lea e saunoa i ai i le \$1miliona lea ua aumai nei o le kavaga o le tupe lea sa faafesui ai i pasi ma le tupe a le Matagaluega. O le Taitaifono foi na fesili lelei lava i le Minisita ma lana Matagaluega i le 2016/2017 i le main lea na faau mai lava le miliona i le output lea on behalf of the state ua tei i le vaai atu ua miliona. Sa fesili lelei lava le Taitaifono, o le a le mea ua miliona ai le mea lea e masani ai? O le tali a le Minisita ma... malilie o lea e faau atu i i le tupe e fai ai le pa. O lea la ou te tau fuafua atu, ua matuai ova, o le mea lea e i ai ua ova pa, ova tane vai, ua le iloa pe se falepuipui e fai ai le pa e falepuipui ai tane vai. O le matuai tele o mea ia e fai i i... a o lea ou te malamalama lelei lava i le mea lea e saunoa i ai le Taitaifono o le Komiti o Tupe.

FOFOGA FETALAI: Malie le sui usufono se i tulai atu le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, masalo ua ova i le 200 le aofai o pagota lea e i uta a. O le a tali atu le Minisita i se taimi ae na pau lava lea o faiga faavae. A oo loa i faiga faavae ona ou tulai atu lea leaga o le mea lena a le Kapeneta e aumai foi i le Kapeneta mo ana faaiuga. O le tulaga lea e taua tele, o lea na oo foi i ai se taofi muamua, o mea nei o fesoasoani e aumai mai fafo, e noatia, afai lava na aumai pasi e faaoga i i i le mea lea, e faaoga lava i le mea lea na aumai ai. Ae afai e toe manatu le Malo e fai se isi auala ina ia faaliliu i ai pasi ia tai pei o le faatau atu i fafo ae aumai seleni ia ua faaliliu seleni e faatino ai ana galuega, pe foai foi ona tapa foi lea o le ioega a Malo i fafo. O lea la ua

faaoga ai le seleni lea, o le mafuaaga lea leaga e i ai le taimi e faatali foi a o fesootai le tatou Ofisa i inei o Iapani i fafo. E oo lava i si tamai mea pei o le sign la e i tai i le auala laupapa, o la e foi e i ai nai suiga na ua moomia a o le faalavelave e toe talosaga foi e tau alu lava i o e toe sui le mea lea ae aumai le sign fou.

Lau Afioga i le Fofoga Fetalai, na pau lava lea o le mea ou te tulai atu ai, leaga e tele tagata na tatalo atu faamolemole pe mafai ona foai mai lea taavale ma lea taavale na faaoga i a tatou taaloga. A ua aoga tele lau fesili e faamalamalama ai foi ma lea mea, o le ala lena e tuai ai ona fai iuga, aemaise lava o isi saunoaga ia na fai, o la e tutu le pasi i fea, o la e tutu le pasi i fea, ona e i ai la nai lavelave ia mo le silafia e tagata. E i ai nai lavelave ia e tatau ona uia e le Malo ina ia mataga mai ai mea ia mo le faaogaina i isi mea, ae a faaletonu loa la le mea lena ae faaoga tupe ia, e aumai lava toe faatumu ma aumai foi i totonu o le Palemene. E leai lava se mea e le aumaia i inei, e aumai uma lava i inei.

FOFOGA FETALAI: Mo le faasaoina o le taimi, se i tulai mai le sui usufono mo Anoamaa i Sasae.

Afioga ALAIASA MUAGUTUTIA MOEFAAUOUO MALAGAITUTOGIA SEPULONA MOANANU (Anoamaa Sasae): Lau Afioga i le Fofoga Fetalai, ou te fia tautala i mea taitasi ia o le Matagaluega lea o le Falepuipui. O le isi foi mea lea sa faapea matou te le lagolagoina, o lea matou te lagolagoina le tatou falepuipui. O lea e vaai atu i tupe nei, o lea foi e tau lagolagoina, ona e pei lava o lea e aumai i lea tala o le tupe ma lea tala o le tupe vaeveaga foi lea leaga o le galuega e... ae i ai la le tupe lea faapea o isi galuega o le falepuipui, a o lea foi ua matou faalogo ua fai le falepuipui lea i Savaii, ae le o sau maoti foi lea pe fia se tupe e alu ai. Ae le faapea o le a sau lava i lalo i i, aua e le faapea o le a tatou o e fai le falepuipui \$20miliona i Upolu ae fai taitasitasi mai Savaii e tatau ona aumai atoa se tau e fai ai le faamoemoe lea. Ma le agaga faaaloalo.

FOFOGA FETALAI: Malie le Minisita o lo o tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai se i ou tali atu lava i le faafesili lea i isi galuega o le falepuipui lea e \$1,175,170. A tagai i le Lipoti a le Komiti o Tupe o lena o lo o lisiina atu i lalo i le Itulau e 17 le auiliiliina o lea vaegatupe. O le galuega i Vaiaata e faauma ai le falepuipui i Vaiaata e \$311,446. O le pa e puipui ese mai ai le falepuipui o tamaitai e \$350,000. O le afi faaleoleo e \$300,000, tane vai lea sa faatoa uma ona faamatala le mafuaaga e \$300,000, uaealesi e \$40,000

ma le fale e teu ai oloa e \$50,000. Ia o le auiliiliga lena o le \$1.1miliona. Ma le faaaloalo.

Afioga ALAIASA MUAGUTUTIA MOEFAAUOUO MALAGAITUTOGIA SEPULONA MOANANU: O lea ou te taulimaina le... a o le agaga lea ou te fai atu ai po ua fia la le atoa, aua lona uiga na o le \$300,000 o lea faatoa aumai lava lea o se Lipoti e sau ai le galuega lea. O le galuega lea ou te fai atu, e pei o lea e fai faapaole Savaii, pe lava ai i le mea lea e allow i totonu o le tatou Tala o le Tupe ae tali mai le Minisita. Ma le agaga faaaloalo.

FOFOGA FETALAI: Tulai mai le Minisita.

Afioga Hon TIALAVEA FEA LENIU TIONISIO HUNT (Minisita mo Auaunaga Tau Falepuipui ma le Toefuataiga): Faafetai lava i lau Afioga i le Fofoga Fetalai, faafetai foi i le Afioga i le Taitaifono o le Komiti o Tupe mo le faamalamalamaina o nisi o vaega o le tala i le falepuipui. O le falepuipui lenei i Tanumalala sa fausiaina i le tolu tausaga talu ai sa aumai ai le Tala o le Tupe ma pasia iinei i le Palemene ma le faaupuga e auauai. O le falepuipui lava ia i le amataga na aumai e \$25miliona e alu ai, ae ona o le lava o tatou tupe na faavasega atu ai e le Ofisa o Tupe mo le tolu tausaga. O le vaega la lea ua aumai nei e \$4,300+miliona lea o le a faauma ai galuega nei. O le galuega lea i Savaii e \$600,000 lea na aumai i le paketi talu ai, lea sa i ai le \$600,000 mo le galuega i Savaii. O le foi lea i Savaii o lo o fausia e le Matagaluega, fesoasoani i le faaitiitia mai o tupe alu. O le pa lea e talanoa mai ai, o le tau o le pa sa i ai e \$2,175,000. O le tau lena o le pa sa faapea e 900mita le umi ae 4mita i luga o le palapala le maualuga ma uaea. Ona aumai lea faapea e fund mai i le tupe lea na maua mai i le faatauga o tupe a le SIDS. O au na ou alu faatalanoa le matai lea Manunu lea sa amepasa talu ai, pe mafai ona aumai se fesoasoani a Sapani mo le fauina o le pa. Na ou muamua i Saina e le talia, ona e le lavea i faiga faavae a Saina se fesoasoani e ave i falepuipui. Ona musumusu mai lea o le amepasa, alu e faatalanoa le Treasury o lena e i ai le tupe o le SIDS ae seiloga e malie atu le Treasury ona avatu ai lea ia te ia na te avea i Sapani e approve mai. O lea na approve mai ai le \$1,300,000 i le paketi o le latou... Ma aumai ai i le paketi o le 2017/2018 le \$2,300,000. E fai ifo le tauofoga e \$2,000,000 le tau o le pa, o lena e i ai le eseese. Ona faaoga lea i tupe na maua atu i tupe talu ai le fauina o le pa, o la e toeitiiti uma. O tupe la ia e \$1,300,000 lea ua sau i le paketi lea o le reimburse ina o tupe lea na faaoga. A outou vaai ifo i le paketi lena e i ai le faaitiitiga o tupe faaalu lena ua aveese mai le main budget e \$800,000. O paleni na o tupe ia na faaoga. O isi galuega, o le

faataina o le auala, o le tane vai fou lea na fai atu nei e uma ifo le galuega o le matua tele lava o le vai, e manaomia se tane vai e ave i ai. O le afi moli e faaleoleo i le falepuipui, o le pamu vai e faaaoga e pamu ai le vai lea pe a... O le main switch board a le falepuipui e le i faia, main switch board mo le lotoa atoa. O le board lena e alu i mea taitasi, ae tatau ona i ai se main switch board o le falepuipui e tu i talane o le afi fou lea e tau aumai.

O isi galuega ia faapea... i Savaii lava ia, e \$600,000 sa faamoemoe e fau ai, o lea lava e taumafai ia maea ai i le \$600,000 i le fauina lava o le fale. O le tapenaga o le suaga o le fanua, o le tanuina, e ese mai la tupe, e faaaoga la tupe ia e fesoasoani atu i le tanuina o le fale. A o le fausiaina o le falepuipui lea ua i Savaii, o la e fau e le Matagaluega. Atonu e i ai nisi ua afifio atu i Savaii, sa faapea foi na o le falepuipui e fau ai, a o la e ua fau ai ma le admin a Savaii ona e i ai lava le faamoemoe o le mea lelei i Upolu e lelei foi mo Savaii. E 50 pagota la e i Savaii, e 40 ma ona tupu pagota o lo o i Olomanu, e 300 lea e i Tafaigata, pagota, ae le taulia ai le au taofia la e i ai e 100 ma ona tupu. O le matua toatele lava, a o la e o lo o lava ma toote fale. Na pau lava le agaga foi o le mea taumafa. E 300,000 le tupe lea e feutagai atu ai i le paketi i tausaga uma mo le taumafataga e tausi ai i latou ia. A faatuputupu i luga pagota, e tatau ona alu le tupe lea i luga. O le mea lea e i ai, o le agaga foi lena o la e ua fai ai faatoaga i Savaii, o Savaii o lo o aumai ai le fofoga taumafa o Tanumalala faapea foi Olomanu. O Olomanu o lo o tausia maia le taulaga i le faamamaina o le taulaga. E momoli ai le faafetai i ai latou o i Olomanu mo le galuega o lo o faatino nei i le taulaga, 2 aso o le vaiaso.

E momoli le faafetai i pagota o lo o i o i Vaiaata. Atonu e i ai lava nisi na oo atu i Vaiaata ua i ai lava le suiga e pei o le fai, o so o se mea taumafa ua maua. Ae o le talo lena e i Vaiaata, sole e faapea e pei o se taamu, e malo, lelei le palapala. O le mea foi lena ua faaaoga ai ia Vaiaata ia, focus lava latou i mea o faatoaga. O tagata foi o lo o ave i Vaiaata, e na o tagata foi ia e faigofie ia le vaaiga. Ia paga lea ua ova i le 50 pagota ua i ai, ae o la e nonofo i tamai fale lava.

O le agaga lena na fau ai le falepuipui. Ia e talitonu o nisi mataupu, e fia malamalama ai foi se isi i le falepuipui, ia tatou malaga i Savaii. Se i outou tagatagai i le falepuipui o la ua toe amata nei le galuega, ua uma le misela, o la ua toe amata le galuega ananafi. E taunuu atu oloa e toe amata ai le galuega, ia faamaea ai le galuega i se taimi o lenei tausaga.

Ia o le faamalamalama lena lau afioga i le Fofoga Fetalai.

Susuga Hon LAULI LEUATEA POLATAIVAO: Lau afioga i le Fofoga Fetalai, pe maua se avanoa?

FOFOGA FETALAI: Ia tulai mai le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: O faiga faavae a lo tatou Malo. O le fonotaga lenei, a tatou fono loa i le Palemene, o fesili e agai uma i o i le Taitaifono o le Komiti o Tupe.

Ua ala la ona ou taua ia le mea lea, ona e pei e foliga mai i le isi fesili na muamua atu i sui usufono na tutulai, e pei e le amanaia ia le Taitaifono o le Komiti o Tupe. E loloto tele le mafuaaga o faiga faavae ia a le Palemene. O le Minisita ma matou uma nei, o le Malo lea. Ae a oo ina aumai le Tala o le Tupe i inei, ma ave loa i o i le Komiti o Tupe, o le Komiti o Tupe, o latou ia e siakiina ia le matou galuega. E valaau sao ai lava ma le Suetusi, ma Ofisa Sili o Pulega uma o Matagaluega, e alu atu e latou te matua tuiina i fesili. E sao le mea lea e fai mai ai le Minisita lea? E sao le mea lea e fai mai ai le Minisita lea? E sao le mea lea e fai mai ai le Minisita lea? O lona uiga o fesili e agai uma i o.

Seiloga la o se mea tau policy, o faiga faavae a le Malo, ona faatoa tulai atu loa lea o le Malo e avatu ia le faavae o au la lea e nafa ma le mea lena.

Lau afioga i le Fofoga Fetalai, se ua leva isi na i totonu o le Maota, ae e le o malamalama lava i faiga faavae a le Palemene. E tutusa uma lava ia Palemene o le taupulega. Aua ne i fesili mai i i aua e ono pepelo le Minisita. Ae fesili i o i le Taitaifono, o ia lena lea sa feagai uma ma tagata nei o le Malo e o atu independently e avatu ia latou fautuaga.

Lau afioga i le Fofoga Fetalai lea ua manino ia le vaega muamua lena. Ae o le vaega lona 2, o le Malo lea e aofia ai ma Minisita Lagolago. Faalogologo mai Minisita Lagolago, e le tau fesili outou, fesili i Minisita, i le mafuaaga o lea mea, ma lea mea, ma lea mea.

O le mataupu lea i le falepuipui, e le i tasi pe lua ni fono ae tele fono a le Kapeneta na talanoa ai. Ma o manatu foi ia e laga mai, o manatu foi ia sa faatalanoaina i totonu o le Kapeneta. O le faamatalaga na oo mai aemaise le mea lea e vevesi ai le atunuu, i mo mea o tagata nei e sosola. E sosola mai i le falepuipui ae o le mea lena na ala ai ona manatu le Kapeneta, e tataua ona fai le falepuipui lelei ia malu, ia matua malu. O upu a i latou mai fafo, paaga a le Malo, e le avatua ni a matou mea i na mea, fai lava e outou i tou tupe. O le ala lena na tuai ai ona faatino ia le mea lea, ia le atinae tele lenei.

Ae a tatou mafaufau i uiga ia ua tulai mai nei, o pagota nei e sosola, sosola mai o fasioti tagata. Sosola mai o toso tamaitai. Matautia le mea lea ua i ai. Ua le saogalemu tagata. E le o se tala lelei lea e alu atu i fafo, aafia ai ma tagata e asiasi mai. O lea sa interview ai au i le 60seconds a Ausetalia. Sa ou taumafai e puipui ia le taulelei o Samoa. O lea e fai pa, o

lea e pa le falepuipui ae pau lava o tagata e faigata ona taofiofi, a oo lava ina manao e sola, e fai lava le auala e sola ai.

O le solaaga lea na sola ai nei, o le faavalevalea o le leoleo, ua alu lava ia tatala, tatala mai i fafo e sau e alu e tunu lana ti. Ia se i vaai i le faavalevalea o lenei leoleo.

Lau afioga i le Fofoga Fetalai, e taua tele le saogalemu. O le saogalemu o aiga, o tatou. O le ala lena na ave mamao ai i o e ui ina taugata, e aveese mai i le mea o lo o toatele ai le atunuu o lo o lotolotoi ai ma fanau. O lea e taumafai ia le Malo e puipui. E toatele o latou e fasioti tagata. O le ala lena na ave ai i o. A ua amata foi la ona aliali mai Savaii. Ua toatele foi la ua avane i o i Savaii ua falepuipui. O lea ua tau atu ua 50, ae o le tele lava o taimi sa na o le tai toatolu, taitoafa, leaga o le amio la e i o o lea foi ua tupu i inei. Ia po o le amio lea e i inei lea foi ua tupu i Savaii.

O le Minisita la e mataala, e le manofonofo, e tatau foi ona fai se mea i Savaii. O le ala lena o lea na augofie le Kapeneta i le tele o lenei seleni o le a faaalu ai. Ae sa sau le Minisita ma le auala faigofie. O la e i ai tagata i totonu o le falepuipui, o tagata e lelei le kamuta, e mafai ona faaoga ona taugofie ai lea. O le faiga la lena o la e fai ai ia Savaii. E le gata la ina faaleleia ia le falepuipui, ae faaleleia foi ma le fale e galulue ai ia le afaigaluega.

Lau afioga i le Fofoga Fetalai, e taua tele ia le faalelei o le siosiomaga e galulue ai leoleo. Ia ma o le mafuaaga lena, e le faapea la e laulau mai nei mea laulau mai nei mea ona faapea lea e le i vaai lelei i ai ia le Kapeneta. Na matua faataua e le Kapeneta ia le faaiuga e fausia ni fale e puipui ai le atunuu.

FOFOGA FETALAI: Ia malo, faafetai, atonu ua...

Susuga Hon LAAULI POLATAIVAO LEUATEA: Lau afioga i le Fofoga Fetalai, o le mea laitiiti lava lea i meataitasi, \$300,000 mo le afa faaleoleo o le Matagaluega faamolemole. Fia fesili atu lava, \$300,000 o au nei sa faatau lau standby power 200kva e le i mamao tele atu, e na o le \$100,000 Samoa na alu ai.

Ia po o le a se silasila a le afioga i le Minisita faapea foi le Taitaifono, pe na silasila lelei i le overcost lea? E tasi lava le naunau atu lau afioga i le Fofoga Fetalai, ia e utiuti ia le tatou faaso. Manumanu ma aputiputi i tupe alu. Tasi lava le mea na ala ai ona ou tulai mai. \$300,000 lea e faaagaga ae o lea ou te molimau atu, 200kva e ola uma ai lou itumalo atoa sa faatau e na o le \$100,000 Samoa. Ma le faaaloalo lava.

FOFOGA FETALAI: Se i tali atu le Taitaifono o le Komiti.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau afioga i le Fofoga Fetalai...

FOFOGA FETALAI: Se i saunoa atu le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Ou te fia fesili atu lava po o le a le tausaga na faatau ai?

Susuga Hon LAAULI POLATAIVAO LEUATEA: O le tausaga lea na tea nei lau afioga.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: E ala la ona ou fesili, ona o la e faaeletise atu e le Malo. O lona uiga la o tupe maumau a le itumalo? Le faatau atu ai o lenei... matua taugata. E \$100,000 Amerika pe?

Susuga Hon LAAULI POLATAIVAO LEUATEA: Lau afioga o lau faatusa... Samoa. E ola ai le itumalo atoa, \$100,000 Samoa e ola ai le itumalo atoa. O le agaga lena o lea ua matau atu...

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Po o ola ai le itumalo i le taimi nei? Ia aua foi o la e ... faatoa ou sau mai nei foi i Savaii. O la e ola atu le eletise.

Susuga Hon LAAULI POLATAIVAO LEUATEA: Leai o ne i te i ua ta mau eseese lau afioga i le Palemia. O le afi lea na ou faatauina **it's for my own personal use**. O le faatusa lea na avatu, e ola ai le itumalo atoa.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: O le mea e tatau ona faamalamalama, o si au lava mea.

Susuga Hon LAAULI POLATAIVAO LEUATEA: E \$100,000 lona tau lau afioga.

Afioga ALIIMALEMANU ALOFA TUUAU: Lau afioga i le Fofoga Fetalai...

FOFOGA FETALAI: Saunoa mai ia le Taitaifono.

Afioga ALIIMALEMANU ALOFA TUUAU: Lau afioga i le Fofoga Fetalai e le i soona tuuina i lalo ia le fuainumera lea. Sa i ai ia tauofoga mai e 3 sa vaavaai i ai ia le Komiti i tauofoga ia sa saili e le Pulega o le Falepuipui. Ma o le tau lea e agavaa lelei pe talafeagai lelei e pito i taugofie mo le tatou falepuipui. Ia o le tali lea o lea sa siaki lelei ia quotes sa aumai ma le faaaloalo.

FOFOGA FETALAI: Se i tulai mai...

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau afioga ou te fia vaai i pepa o le tau lea na aumai e le sui usufono, ma ou te manao e table i i le Palemene pe sao.

FOFOGA FETALAI: Ia ua faatuina mai, ina ia... o e tau tulai mai ia le sui usufono?

Susuga Hon LAAULI POLATAIVAO LEUATEA: Lau afioga o lea lava. E mafai ona ou tuu maia ia faamaumaga mo le silafia e le Maota, ma lou agaga faaaloalo.

FOFOGA FETALAI: Ia faapea au o auala faigofie, ia ae o lea la ua e tautino mai e mafai, o le a tapa ia...se i tulai mai ia le...

**LAFO MO LE TUUINA MAI O FAAMAONIGA O LE SAUNOAGA
A LE SUI USUFONO MO GAGAIFOMAU GA NU.3 I LUMA O LE
PALEMENE I TOTONU O LE 48 ITULA**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau afioga i le Fofoga Fetalai, *E ala la ona ou manaomia e faataoto pepa ia i totonu o le Palemene, ina ia tatou iloa uma ai, le faamaonia o mea ia. A na faapea la o se kamupani e mataala i le tau lea, sa tatau foi la ona tender. Aua e i ai isi ituaiga mea e maua faapena, ae maua i se ala le manuia.*

FOFOGA FETALAI: Faafetai. Leai sa ou tapa le afioga i le sui usufono o Gagaifomauga i sona finagalo faapea ua na o se faamatalaga foi nei e

faatusatusa ae o lea la ua e tautino mai, ia lea la o le a ou tapa le faaluaina o le lafo ua tuuina mai e le Palemia. O se isi e faaluaina le lafo ina ia tuuina mai le faamaoniga.

Faaluaina e le Minisita mo Tina ma Tamaitai, Atinae o Nu'u ma Afioga ma Agafesootai ma le Minisita mo Pisinisi, Alamanuia ma Leipa.

Na faamaonia le lafo.

FOFOGA FETALAI: Ma ou te tuuina atu le 48 itula e tusa ai ma Tulafono Tumau ina ia tuuina mai ia le faamaoniga o au saunoaga, le tau, e pei ona taua i le Maota Fono.

Ia ma e fesoasoani atu e pei ona saunoa ia le afioga i le Palemia ou te musu ina ne i le afea i sa matou tala. O le tele o sui usufono mamalu ua fai si leva i le Maota lenei, ia ae e le o latou faatauaina le tofi, le tiute o le Komiti o Tupe. Ia e manatua e uma loa ona faataatia i luma o le Laulauafono o le Palemene ia le Tala Autu ma le Tala Faaopoopo o le Tupe, ia ona malolo lea o le Fono mo le 14 aso se i fai le galuega a le Komiti o Tupe ona lipoti mai lea i le tatou Fono i le 14 aso, ona tatou galulue lea.

O latou la lea e tali mai i le tulaga o le faamalamalamaina i le taimi i meataitasi pe a see mai le tatou Fono i fesili i mea e fia malamalama ai ia sui usufono mamalu. Ia o se itu aoga lea o le toe faapupula o lea itu. Ia o faiga faavae e saunoa i ai ia le Minisita ma ua maea ai ia le faauilavea i lenei mataupu.

Faamaonia le \$4,350,729 mo Auaunaga tau Falepuipui ma le Toefuataiga.

AOFAI FAAOPOOPOGA I TUPE ALU **\$23,596,953.**
AOAO 2019/2020:

Faamaonia.

FAAMATALAGA LONA LUA

FAAITITIGA I TUPE FAATATAUINA

**MATAGALUEGA FAAMATALAGA AOFAI TUPE
FAAITITIA**

**FAAMASINOVA MA PULEGA
TAU FAAMASINOVA: \$(350,000).**

Faamaonia.

**AUAUNAGA TAU FALEPUIPUI
MA LE TOEFUATAIGA: \$(806,549).**

Faamaonia.

**AOFAI FAAITITIGA AOA O I TUPE
ALU 2019/2020: \$(1,156,549)**

Faamaonia.

**FUAIUPU 2: Faamatuu atu ma le Faatatauina o le \$23,596,953 mai le
Faaputugatupe a le Matagaluega o Tupe.**

Faamaonia.

**FUAIUPU 3: Faaititiga o aofaiga na uluai faatatauina ma toe
faasoasoa atu i isi galuega faatino ma galuega faatino
laiti.**

Faamaonia.

FAAMATALAGA:

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.1) 2019/2020.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2019/2020 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2019/2020 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai, e muamua ona momoli atu le faamalo ma le faafetai i lau Afioga faapea foi sui usufono mamalu o le Palemene. O lea ua tatou taunuu mai i le faaiuga foi o faamatalaga ma le faamaopoopoina o le tatou Tala Faatatau o le Tupe. O lea ou te tulai atu ai ma le faaaloalo lava e faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2019/2020 i lona faitauga faatolu.*

Faaluaina e le Minisita mo Aoga, Taaloga ma Aganuu ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

Na faaalua le agaga fiafia o le Maota i le patipati o latou aao ina ua pasia le Tala o le Tupe.

FOFOGA FETALAI: Ia, malo faafetai o lea ua maea galuega na fuafuaina mo le aso. E i ai le manatu ua faaaaogagase le tulaga o le tatou galuega, ui i lea, o le mea sili ua tea atu ma o outou aao ma o tatou lima le faatinoga o le galuega aua le Tala Faatatau Faaopoopo o le Tupe aua le faatinoga o tiute ma faiva ma galuega aua le atiaeina o le atunuu. Ae tatou te le i tolopo ou te faaiuina le tatou Fonotaga i se tatalo.

Na tolopo Felafolafoaiga a le Fono Aoaio Faitulafono i le itula e 1:55 i le afiafi seia aulia le itula e 9:00 i le taeao o le Aso Gafua, 27 Ianuari 2020.